

Tuhun vaha nacahyí Marcos saha Jesucristo

*Tá jácandúta Juan ñayivi yucú íchí
(Mt. 3:1-12; Lc. 3:1-9, 15-17; Jn. 1:19-28)*

¹ Quiahva johō nacava sáhá tuhun vaha cáhan saha Jesucristo, mé a cúu in túhún jini já jahyi Ndióxi.

² Sanahá nacahyí profeta Isaías ña nacahan Ndióxi xihín jahyi a. Já cáchí a já:

Chindahá i in da canuú cuhun nu mún,
ña ná caxi tuhun da nuú ñayivi saha yóhó ta já ndaja
ndacú da íchí nuú yahún.

³ Ta cahān cóhó da tañu yucú íchí ta cachi da já xihín ñayivi:

“Caja tiahva ndó íchí nuú quixi xitoho í ta cuná ndó in íchí
ndacú nu mé á ña ná ndihvi a ínimā ndo”, nacahyí
Isaías.

⁴ Ta ndaja coo íin Juan yucú íchí ta nacasáhá cája ndúta dá ñayivi. Ta cáxi tuhun da xihín ná ña tá cúní na caja cáhnu iní Ndióxi sahá cuachi na já ndítahan nu ná ndicó coo ini na ta já candúta ná. ⁵ Chí naquixi cuahá ndivaha ñayivi estado Judea xihín ñuu Jerusalén taa johō na nu cáhan da ta tá náhma na cuachi na já nacaja ndúta dá na ini yuta Jordán.

⁶ Ta nasandixi mé Juan yóhō jáhma ña nacavaha na xihín íji camello ta nasandico in ní jáhndá tóco dá. Ta naxixi da tica xihín ñuñu yúcú. ⁷ Tá cáxi tuhun da nuú ñayivi já cáchí da já:

—Jatá yehe vaxi in da íin cuaha chága ndée dá a juú ga yehe chí coó sahá i ndica xítí i nu dá ña ndaxí i correa ndusa dá. ⁸ Yehe najácandúta i ndohó xihín ticuí joo mé

da cán cúu da jándicutú ínima ndó xihín ínima yii Ndióxi —ñacachi Juan xihín ná.

Tá ñacandúta Jesús

(Mt. 3:13-17; Lc. 3:21-22)

⁹ Mé tiempo já ñaquee Jesús ñuu Nazaret ña ndácaan estado Galilea. Naxinu a nu íin Juan ta najácandúta Juan Jesús ini yuta Jordán cán. ¹⁰ Ta tá ñaquee Jesús ticuí cán já ñaxini a ñandinuna indivi ta ñanuu ínima yii Ndióxi jata mé á. Ta cáa ínima yii Ndióxi yóho tá quiahva cáa in ndijata. ¹¹ Ta ñaxini johó na cáhan in a indivi ta já cáchí a já:

—Yóhó cúun jahyi máni i ta cájii ndivaha ini i xuhun.

Tá ñaxito ndojó tiñáhá sacuahá Jesús

(Mt. 4:1-11; Lc. 4:1-13)

¹² Ivi laá ñasahan ínima yii Ndióxi ndáca Jesús yucú íchí nu cóó ñayivi. ¹³ Ta cán ñasahin a ivi jico quivi ta mé tiñáhá sacuahá ñaxito ndojó rí a. Ta cán ndúu quití quini joo ñaxinu java tátó Ndióxi chindeé na mé á.

Cásahá Jesús cáhan tuhun vaha xihín ñayivi

(Mt. 4:12-17; Lc. 4:14-15)

¹⁴ Tá ñandihi nachicaan na Juan vecaa já ñasahan Jesús estado Galilea caxi tuhun a nuú ñayivi tuhun vaha saha Ndióxi. ¹⁵ Já cáchí a já xihín ná:

—Sa ñaxinu tiempo viti ta ñacayati quivi cacomí Ndióxi cuéntá sahá ñayivi. Ña ndítahan nu ndó quéa jándacoo ndó cuachi cája ndó ta candúsa ndó tuhun vaha ña cuu jácacu ndohó —ñacachi Jesús.

Cána Jesús comí na caca tuun xihín á

(Mt. 4:18-22; Lc.: 5:1-11)

¹⁶ In tañu xíca Jesús cuahan yati yuhú tañuhú Galilea. Ta ñaxini a in da naní Simón xihín Andrés, da cúu ñani.

Ndíví mé da yóho cúú dá da tává tiyacá ta ñúhu da jácana da ñúnu dá ini tañuhú. ¹⁷ Nacasáhá cáchí Jesús já xihín dá:

—Naha quíi ndó candico ndó yehe caca tuun ndó xihín i. Tává ndó tiyacá viti joo caja i ña ná cuu tavá ndó ñayivi tañu cuachi —nacachi Jesús.

¹⁸ Ta chí ivi laa najándacoo da ñúnu dá ta nandico da Jesús.

¹⁹ Anda já naxica loho ga Jesús chí nuu já naxini a Jacobo xihín ñani da Juan, da cúú jahyi Zebedeo. Ndíví da yóho ñúhu da ini barco ndája vaha da ñúnu dá. ²⁰ Nacana Jesús ndíví da yóho ta chí najándacoo da tátá da, Zebedeo cán ini barco xihín java ga da cája chúun xihín dá ta já nacasáhá xíca tuun da xihín Jesús.

Tá ndácaan ínima quini ini in datqa

(Lc. 4:31-37)

²¹ Naxinu coo Jesús xihín na xíca tuun xihín á ñuu Capernaum. Ta tá natandaa quivi ndíquehe ndée ñayivi já naquihvi Jesús ini veñuhu ta nacasáhá jánaħa na cán. ²² Ta nacatontó tóco ndihi ñayivi sahá tuhun cáħan mé á jáchi najánaħa mé á tátuhun in da ín saħa cahnda chuun ta co cáħan tátuhun na jánaħa ley Moisés. ²³ Ini mé veñuhu cán nasandacaan in datqa, da ndácaan ínima quini ini. Nacasáhá cáyuhú rí cán já cáchí rí já:

²⁴ —Jesús, da ñuu Nazaret. Ndá cuéntá quéa quíhvi nuún xihín nde. Á vasún jándihún sahá nde. Sa xini vaha i yohó ta cánda cáxí ini i ña cúún in da yii nachindahá Ndióxi —nacachi rí cán.

²⁵ Ta nacasáhá Jesús jánaħi a rí quini ndácaan ini da cán. Já nacachi a já:

—Caji yúħun ta janí da yóho.

²⁶ Ta tá quéta rí quini ndácaan ini da cán nasahní yihí rí da ta cáyuhú cóhó rí já naqueta rí ini da cán. ²⁷ Nacatontó

tóco ndihi ñayivi chí ñacasáhá ndáca tuhún táhan na já cáchí ña já:

—Ndía quéa yóho. Ta ndá ñaquixi tuhun saá jánaḥa da yóho jáchi cáhan da xihín rí quini tátuhun in da sáhdá chuun ta chí cándúsa rí quee rí cuhun ri —ñacachi na.

²⁸ Ta chí cama chá ñandicuita nuu tuhun saḥa Jesús níi cúu estado Galilea.

Ta ñandaja vaha Jesús ñá cúu xojo Simón

(Mt. 8:14-15; Lc. 4:38-39)

²⁹ Tá ñaquee na veñuhu já cuḥan Jesús xihín Jacobo xihín Juan vehe Simón xihín ñani da, Andrés. ³⁰ Ta ndaja coo cándúhu ñá cúu xojo Simón nuu xito ñachicaan cáhni ndeé ña. Ta tá ñaxinu coo ña cán já ñacaxi tuhun na nuú Jesús ña quíhvi ña. ³¹ Anda já ñacayati Jesús nu ña ta ñatiin a ndáha ña já ñandiñehe a ña chí ivi laá ñandindaa cáhni á ña. Anda já ñacasáhá cája ndíví ña ña cuxu na.

Ndája vaha Jesús cuahá ñayivi

(Mt. 8:16-17; Lc. 4:40-41)

³² Tá ñaqueta nuu candii ta ñacuaá já ñéhe ndihi ñayivi ña quíhvi xihín ña ñúhu ínima quini ini ñacasaa ña nu Jesús. ³³ Ta tóco ndihi ña ñuu ñandai cuu na yuyéhe nu íin Jesús. ³⁴ Ñandaja vaha Jesús cuahá ñayivi, ña ndóho tá nuú cuehe. Ta ñatavá a cuahá ínima quini ini ñayivi. Joo coo ñasaḥan Jesús ñamaní nu rí quini ña ná caḥan rí jáchi xíni rí yo cúu Jesús.

Xíca nuu Jesús jánaḥa ñayivi estado Galilea

(Lc. 4:42-44)

³⁵ Ta naha inga quiví itaan tá cámaní yíi tiví ñandacoo Jesús ta ñaquee a ñuu cuḥan nuú coo ñayivi ña caça táhvi a nu Ndióxi. ³⁶ Tá ñandacoo Simón xihín java ga da xíca tuun xihín Jesús já ñaxini na ña coo a íin chí ñaquee na

cuah̄an n̄a ndinducú n̄a mé á. ³⁷ Ta tá n̄andiñehe ñahá n̄a já cáchí n̄a já xih̄in á:

—Tóco ndihi ñayivi ndinducú n̄a ndohó.

³⁸ Joo cáchí Jesús já xih̄in ná:

—Cóho java ga ñuu yati yóho ña ná jánaḥa i tuhun vaha nuú n̄a cán viti jách̄i sahá ña yóho vaxi i —cáchí Jesús.

³⁹ Ta chí nax̄ica nuu Jesús níí cúú estado Galilea cáhan tuhun vaha ini veñuhu in in ñuu cán ta táva a ínima quini ndácaan ini ñayivi.

Tá nandaja vaha Jesús in da ndóho cuehe táhyi

(Mt. 8:1-4; Lc. 5:12-16)

⁴⁰ Ta ndaja coo nacayati in dataa ndóho cuehe táhyi nuú Jesús ta nacaxítí da nu á já nacasáhá cáchí da já:

—Cuu ndaja vaha ndó yehe tá cúni ndó —cáchí da.

⁴¹ Ta natahvi ini Jesús saḥa dá. Anda já nacani ndaa ndáha á da. Já cáchí a já:

—Cúni ña ná ndivahún ña cán quea nandivahún viti —nacachi Jesús xih̄in dá.

⁴² Tá nacachi a já chí ivi laá nandindaa cuehe táhyi ña nandoho da cán. Já nandivií yiquí cuñu da. ⁴³ Tá nandih̄i najándindayí Jesús da ta nasahnda chuun nu dá já cáchí a já xih̄in dá:

⁴⁴ —Candehé. A cáhun xih̄in ni in túhún toho ñayivi ña nacaja i xuhun. Cuáhán ndacún nahun mún nuú jutú. Ta ndítahan jocún ñaha nu Ndióxi tátuhun nasahnda ley Moisés sanahá caja n̄a sa nandivaha. Já ná candaa ini tóco ndihi ñayivi ña sa nandindaa va cuehe nasandohún —nacachi Jesús xih̄in dá.

⁴⁵ Joo tá naquee da cuah̄an da nacasáhá da ndícani da nuú ndihi ñayivi ña nandaja vaha Jesús da sahá ña cán quea coó nacuu ga ndih̄vi tívi Jesús ni in ñuu. Jatá ñuu nuú co ndúu ñayivi nasah̄in a ta janda mé cán xinu coo ñayivi, n̄a quíxi nuú ndijáá ñuu xító nihni na mé á.

2

Tá nandaja vaha Jesús in da naxihí tuchu saha
(Mt. 9:1-8; Lc. 5:17-26)

¹ Tá nayaha chá quivi já nandicó coo tucu Jesús ñuu Capernaum. Ta nacandaa ini ñayivi ña ñin a vehe. ² Ta chí cama chá nanditútú cuahá ñayivi chí coo vátí ga yuyéhé cándita na. Já nacasáhá cáxi tũhun Jesús tũhun Ndióxi nu ná. ³ Andá já naxinu coo comí taa ta ñehe da in da naxihí tuchu saha. Nasaa da nu ñin Jesús. ⁴ Joo naxini da ña a cuú xinu da yati nu ñin Jesús sahá cuahá ñayivi chútú ndaa nu ñin a cán. Chí nandaa da jiní véhe ta nacasáhá da súná da jiní véhe mé xoo nu ñin Jesús. Ta mé cán najánuu da xito loho nu cándúhu da quíhvi chí yávi jiní véhe cán. ⁵ Tá naxini Jesús ña cándeé ini da cán mé á já cáhí a já xihín mé da quíhvi cán:

—Candehé, jahyi a. Sa nacaja cáhnu ini i saha cuachún viti —nacachi Jesús.

⁶ Joo java na jánaħa ley Moisés nduu coo cán nacasáhá cáhán na: ⁷ “Ndá cuéntá queá ndája núu da Ndióxi xihín tũhun cáħan da. Jáchi ni in túhún toho ñayivi a cuú caja cáhnu ini sahá cuachi. In túhún jiní Ndióxi queá cuu caja cáhnu ini sahá cuachi”, nacahán na. ⁸ Joo sa nacandaa ini Jesús ña cáhvi ini na cán chí nacachi a já xihín ná:

—Ndávaha cáhán ndo já. ⁹ Á cáhán ndó ña ihvi chága cachi i xihín da yóho: “Nacaja cáhnu ini i saha cuachún viti.” Á tá coo ta cachi i xihín dá: “Cuándacoo, ndiquehe xitún ta caca nuún.” ¹⁰ Candehé vaha ndó ná naħa i nu ndo ña ñin sahá i, da nachindahá Ndióxi nduu u ñayivi caja cáhnu ini i sahá cuachi cája ñayivi ñuyívi yóho —nacachi Jesús xihín ná.

Andá já nacachi a xihín mé da naxihí tuchu saha cán:

¹¹ —Ta viti cáħan i xuhun cuándacoo ndiquehe xito lohún ta cuanúhu —nacachi a.

¹² Chí ivi laá nandacoo mé da quíhvi cán ta nandiquehe da xito loho da já naquee da cuahan da nuú ndihi na ndúu cán. Anda já nacatontó tóco ndihi na ta nacasáhá cája cáhnu na Ndióxi já cáhí na já:

—Ni in túhún tañu coó naxini nde in ñaha cáhnu tátuhun ña yóho —nacachi na.

*Tá nacana Jesús Leví, da cáhan na Mateo xihín
(Mt. 9:9-13; Lc. 5:27-32)*

¹³ Tá nandihí já nasahan tucu Jesús yuhú tañuhú cán ta tá nacayati cuahá ñayivi nu á já nacasáhá jánaha nu ná.

¹⁴ Nani xíca Jesús cuahan nayaha nu íin in da naní Leví, jahyi Alfeo. Ta íin coo da nu sácoo da játaca jiuhún cuéntá impuesto. Ta cáhí a já xihín dá:

—Naha quí candicun yehe.

Anda já nandaca ndichi Leví ta nandico da Jesús.

¹⁵ Tá nandihí nasahan Jesús vehe Leví ta nasacoo a xíxi a xihín cuahá da játaca jiuhún cuéntá impuesto xihín java ga na cája cuachi. Ta sa mé cán nasanduu ri java da xíca tuun xihín Jesús xíxi da tañu na cán jáchi cuahá ñayivi ndico na Jesús. ¹⁶ Joo na jánaha ley Moisés xihín na fariseo tá naxini na íin coo Jesús xíxi a xihín na cán nacasáhá cáhí na já xihín da xíca tuun xihín Jesús:

—Ndá cuéntá quea xíxi xitoho ndó xihín na játaca jiuhún cuéntá impuesto ta xihín java ga na cája cuachi —nacachi na cán.

¹⁷ Tá naxini johó Jesús ña yóho nacasáhá cáhí a já:

—Ñayivi íin vaha coo xíní ñúhú toho na da cája tátá ñahá joo na quíhvi, na cán cúu na xíní ñúhú da cája tátá ñahá. Ta yehe coó vaxi toho i cana i na sa íin vaha. Vaxi i cana i ñayivi, na cája cuachi ña ná jándacoo na cuachi cája na —nacachi Jesús.

Cáhan Jesús ndá saha quéa cajuhun na

(Mt. 9:14-17; Lc. 5:33-39)

¹⁸ In tañu tá xíjuhun na xíca xihín Juan xihín na xíca xihín na fariseo naxinu coo java ñayivi nu Jesús ta ñacasáhá ndáca tuhún na mé á já cáchí na já:

—Ndávaha co xíjuhun toho na xíca tuun xihín yóhó joo xíjuhun mé nde, na xíca xihín Juan xihín na xíca xihín na fariseo —ñacachi na.

¹⁹ Ta nanducú ñehe Jesús tuhun nu ná já ñacachi a já:

—Á cáhán ndo xíjuhun na ndúu víco tándaḥa nani ín mé da tándaḥa cán xihín ná. Uḥun. Jáchi cáji íní na nani ín mé da tándaḥa xihín ná. Chí a cuú toho cajuhun na.

²⁰ Joo xinu quivi candaa na mé da tándaḥa ta anda jávi casáhá cajuhun na. Ta cáchí i xihín ndó ña vaxi quivi candaa na yehe nuú na yóho ta anda jávi casáhá na xíca tuun xihín i cajuhun na —ñacachi Jesús.

²¹ Ta ñasacu Jesús inga quiahva nu ná já cáchí a já:

—Ama ná jándaha ñayivi jahmá yatá xihín in túhun jáhma saá jáchi tá nandihí ndíndí a, sáhdá chága ví a jahmá yatá cán ta jándacáhnú chága ví a yávi ña nandicahmá na cán. ²² Ta ni co táán na vino saá ini vóso ní yatá jáchi jácahndí mé vino cán ní ta cuiṭa mé vino cán ta tívi vóso ní caja dó sahá ña cán quéa ndítahan taán na vino saá ini vóso ní saá —ñacachi a.

Ña ñacaja na xíca tuun xihín Jesús in quivi ndiquehe ndée ñayivi

(Mt. 12:1-8; Lc. 6:1-5)

²³ In quivi ndiquehe ndée ñayivi nani xíca Jesús cuahan tañu nuú naxutu na trigo xihín na xíca tuun xihín á já ñacasáhá túhun na yucu jiní trigo. ²⁴ Tá naxini na fariseo ña cája na já ñacachi na já xihín Jesús:

—Candehé. Ndávaha cája na xíca tuun xuhun chuun ña co ndítahan cajú na quivi ndíquehe ndée yo —nacachi na fariseo.

²⁵ Anda já nacachi Jesús já xihin ná:

—Á a ñáha cahvi ndó nuú tuhun Ndióxi nu cáhan sahá ña nacaja David sanahá tá nacuico mé dá xihín na xíca xihin dá. ²⁶ Ña nacaja David quea naquihvi da veñuhu Ndióxi tá nasacu Abiatar da sacuahá nuú jutú. Já naxixi da pan yii ña in túhún jutú cúú da ndítahan nuú cuxu ña cán, nduu. Joo naxixi David ña ta nasahan da ña nuú java ga na xíca xihin dá.

²⁷ Ta nacachi tucu Jesús já xihin ná:

—Candehé ndo. Coó nacavaha Ndióxi ñayivi ndoho ini na sahá quivi ndíquehe ndée ná jáchi nasacu ini a cavaha in quivi já ná cuu ndíquehe ndée ñayivi. ²⁸ Ña cán quea yehe va, da nachindahá Ndióxi nduu ñayivi in sahá i cahnda i chuun sahá quivi ndíquehe ndée ñayivi —nacachi Jesús.

3

Tá nandaja vaha Jesús in da nahichi ndáha

(Mt. 12:9-14; Lc. 6:6-11)

¹ Naquihvi tucu Jesús ini veñuhu ta cán nasandacaan in dataa, da nahichi ndáha. ² Ta nacasahá nání na fariseo Jesús sándehe ná á ndaja vaha mé á da cán quivi ndíquehe ndée ná já ná cuu chicaan na cuachi jatá. ³ Anda já cáchi Jesús xihín da nahichi ndáha cán já:

—Cuándaco ta candichi mahnú yóho —nacachi Jesús.

⁴ Anda já nandaca tuhún a na java cán já cáchi a já xihin ná:

—Ndía cáchi ley ndítahan cajú í mé quivi ndíquehe ndée ñayivi. Á chindeé yó ñayivi á cajú í ña núu xihin ná. Á jácacú na á cahní yó na —nacachi Jesús.

Joo ni in túhún t̄uhun coó naçahan na. ⁵ Nacasáhá xójo ini Jesús sándehe a nu ná. Joo táhvi tucu ini a saha ná jáchi cúú ná ñayivi sáá ini. Ta cáchi a xihín mé d̄ataa, da nahichi ndáha cán:

—Jándacaa ndáhun.

Tá najándacaa da ndáha dá ivi laá nandivaha ndáha dá. ⁶ Tá nandihí naquee na fariseo veñuhu já nacasáhá na jándique táhan na t̄uhun na xihín na cuéntá Herodes ña cahní na Jesús.

Tá nanditútú cuahá ñayivi yuhú tañuhú

⁷ Joo nasahan Jesús xihín na xíca tuun xihín á yuhú tañuhú ta cuahá ndivaha ñayivi estado Galilea nandico na nasahan na. ⁸ Tá nacandaa ini ñayivi ña náhnu cája Jesús, naquixi cuahá na estado Judea xihín na ñuu Jerusalén xihín na ñundáhyi Idumea xihín na inga xoo yuta Jordán xihín java na ndúu ñuu válí jín ñuu Tiro xihín Sidón jáchi candehe na Jesús cúni na. ⁹ Sahá ña yóho quea naxica Jesús ñamani nuú na xíca tuun xihín á ña ná cacu tiahva na in barco nuú ndacaan mé á ña ná a cándíhi ñayivi cuaha cán ña. ¹⁰ Jáchi cuahá ndivaha ñayivi nandaja vaha mé á. Sahá ña cán quea tóco ndihí na quíhvi cáti na jatá ña cani ndaa ndáha ná mé á cúni na.

¹¹ Ta tá naxini na ñúhu ínima quini ini cán Jesús ivi laá ndícava xítí na nu á ta casáhá cáyuhú cóhó na já cáchi rí quini ndacaan ini na cán já:

—Yóhó cúun da cúú in túhún jini já jahyi Ndióxi.

¹² Joo jánani Jesús rí cán já sáhndá a chuun nu ri ña ná a cáxi t̄uhun rí yo cúú mé á.

*Tá naçaxi Jesús uxu ivi da cacu tuun xihín á
(Mt. 10:1-4; Lc. 6:12-16)*

¹³ Tá nandihí já naquee xóo Jesús nasahan in xiqui ta tá nandihí nacana mé á java na xíca xihín á cán, mé na

cúni a caxi a ta naxinu na cán nu Jesús. ¹⁴ Ta tañu na cán nandicaxi Jesús uxu ivi da caca tuun xihin á ta tá nandihi já nachindahá mé á da cuhun da cahan da tuhun Ndióxi xihin ñayivi. ¹⁵ Ta naxaja mé á ña cuu ndaja vaha da na quihvi ta cuu cahnda da chuun nu rí quini ña ná quee rí ini ñayivi. ¹⁶ Ña yóho cúu quivi uxu ivi da nandicaxi Jesús caca tuun xihin á: Simón, da nasacu tucu a quivi cananí Pedro ¹⁷ xihin Jacobo xihin ñani da, da naní Juan, jahyi Zebedeo. Ndívi da yóho nasacu a quivi cananí Boanerges ta mé tuhun yóho cúni cachi a cúu dá tátuhun jahyi in tasa ña cána indivi. ¹⁸ Naxaxi a Andrés xihin Felipe xihin Bartolomé xihin Mateo xihin Tomás xihin Jacobo, da cúu jahyi Alfeo xihin Tadeo xihin Simón, da naxica cuéntá na cananista ¹⁹ xihin Judas Iscariote, mé da najicó túhún Jesús tá nu ndíhi.

Jácho na cuachi jatá Jesús ña cája chúun a xihin ndée tiñáhá sacuahá

(Mt. 12:22-32; Lc. 11:14-23; 12:10)

Anda já naquihvi Jesús ini in vehe xihin na xica tuun xihin á. ²⁰ Ta inga tucu nachutú cuahá ñayivi nu íin a janda a cuú cuxu a xihin na xica tuun xihin á cán. ²¹ Ta tá nañehé na vehe Jesús tuhun sahá ña yóho ivi laá naquixi na ña cañehe na mé á cuhun a cúni na jáchi nacatachi Jesús cáhán na.

²² Jári na jánaha ley Moisés, na naquixi Jerusalén nacasáhá cahan na já cáchi na já:

—Taa yóho ndácaan Beelzebú ini da, rí cúu sacuahá nu rí quini. Ta xihin ndée mé rí cán tává da rí quini ini ñayivi —nacachi na.

²³ Anda já nacana Jesús ñayivi já nasacu a in quihva nu ná ja cáchi a já xihin ná:

—A cuú tavá tiñáhá sacuahá mé rí. ²⁴ Jáchi tá sáhnda java táhan na ndúu in ñuu ta cáni táhan ndaja táhan mé

va na já queá a ñéhe íní na coo nahá na. ²⁵ Ta tá cásáhá sáhndá java táhan na ndúu in vehe ta cáni táhan na já a cuú ga canduu nahá na mé vehe cán. ²⁶ Ta quiahva já tá ná casáhá rí quini ndúu ndáha tiñáhá sacuaaha cáni táhan rí xihín mé va rí janda quiahva sáhndá java táhan rí já queá a cuú canduu nahá rí jáchi ndihi saha rí.

²⁷ Sácú u inga quiahva nu ndo. Ni in dataa a cuú ndihvi da caja cuíhná da ñaha vehe in da ndacú cán joo tá ná cató da da ndacú já cuu quehe da ñaha da cán.

²⁸ Mé a ndaa ná cahan i xihín ndo. Ndióxi cuu caja cáhnu ini a saha tá nuú cuachi cája ñayivi xihín saha tá nuú tuhun quini cahan na. ²⁹ Joo tá ná cahan núu na saha ínimá yii Ndióxi já queá a cája cáhnu ini Ndióxi sahá ña nacaja na ta anda ama cáa quivi candojo na cuachi sahá —nacachi Jesús.

³⁰ Nacachi a ña yóho xihín na cán jáchi cáchí na ña ndácaan ínimá quini ini a.

Nána Jesús xihín ñani a cuni na cuni na a
(Mt. 12:46-50; Lc. 8:19-21)

³¹ Tá nandihí naxinu náná Jesús xihín ñani a nu íin a joo nacandoo na jata véhe. Ta nachindahá na in na nasahan nacana ñahá. ³² Ta na ndúu coo xihín Jesús cáchí na já xihín á:

—Jata véhe cáa íin nánún xihín ñanún ta ndínducú na yohó —cáchí na xihín Jesús.

³³ Anda já nacachi Jesús já xihín ná:

—Ná cahan i xihín ndo yo já cúu tátuhun náná i xihín ñani i.

³⁴ Anda já nasandehé a nuú na ndúu coo tiyivi xihín á cán já cáchí a já xihín ná:

—Na yóho cúu ná tátuhun náná i xihín ñani i. ³⁵ Jáchi ndá na cája ña cuni Ndióxi, na cán cúu ná tátuhun ñani i xihín quiahvá i xihín náná i —nacachi Jesús.

4

Sácú Jesús quiahva sahá in da sátá tata

(Mt. 13:1-9; Lc. 8:4-8)

¹ Nacasáhá tucu Jesús jánaha ñayivi yuhú tañuhú ta nataca cuahá ñayivi nu ín a cán. A juú quiahva cuaha cúu ná sahá ña cán quea naquihvi Jesús ini in barco, dó cándichi yuhú tañuhú cán. Ta nasacoo a cán ta tóco ndihi ñayivi nandaca ndita na nuú ñutí yuhú tañuhú cán. ² Já najánaha cuahá ñaha nuú na cán ta nasacu a quiahva nu ná já cáchí a já:

³ —Cuni johó ndó ña yóho: In da sátá tata naquee da cuahan da cata da ña. ⁴ Ta tá sátá da ña cuahan da nacuyu java ña íchi ta naxinu laa ta nasaxí rí a. ⁵ Ta java ña nacuyu a tañu yuu nuú coo cuaha ñúhu. Ta cama chá nanduta mé tata cán jáchi co cúná ñúhu nuú nacuyu a. ⁶ Joo tá naqueta cándii já najáhichi a ña sahá ña coo cuaha yóho a chí nandihí sahá. ⁷ Ta java tata nacuyu a tañu tohíñú ta tá nasahnu tohíñú cán já nanditáha ndihí a nacaja tohíñú chí coo nasahan mé tata cán ndá ñaha jáquee na nu á. ⁸ Ta java tata nacuyu a nuú ñuhú vaha. Nanduta mé tata cán ta nasahnu a já nasahan cuahá ñaha ña jáquee na nu á. Java ña nasahan oco uxu a nuú in in tata ta java ña nasahan uni jico uxu a ta java ña in ciento a nuú in in tata.

⁹ Anda já nacachi tucu Jesús já xihin ná:

—Na ín johó, ná cuni johó na —nacachi a.

Ndícani Jesús ndá saha quea nasacu a quiahva nu ná

(Mt. 13:10-17; Lc. 8:9-10)

¹⁰ Tá nacandoo Jesús xihin mé na uxu ivi xíca tuun xihin á cán xihin java ga na ndíco ñahá cán já nacasáhá ndaca tuhún na Jesús ña ndía cúní cachi a xihin quiahva nasacu a nuú na cán. ¹¹ Ta cáchí a já xihin ná:

—Ñā cōó nacandaa ini ndó jihna ñā cán cándaa ini ndó a viti jáchī nasuná Ndióxi xíní túnī ndo cándaa ini ndó ndá quiahva cacomí mé á cuéntá sahá ñayivi. Joo na a ñaha cacomí Ndióxi cuéntá saha, na cán cúú na sácú u quiahva nuu. ¹² Já queá vatí sándehe na joo cúú ná tátuhun na cō tívī nuu ta vatí xínī johō na joo cúú ná tátuhun na jóhō jáchī cō cándaa ini na ñā cáhan i xihín ná. Ta sahá ñā cán queá cō ndícó cōo na nu Ndióxi ta ni mé á cō cája cáhnu ini sahá cuachi na.

Ndícani Jesús sahá da sátá tata cán

(Mt. 13:18-23; Lc. 8:11-15)

¹³ Ta já cáhī tucu a já xihín na xíca tuun xihín á:

—Ta tá cō cándaa ini ndó quiahva, ñā nasacu u yóho ndaja caja ndó candaa ini ndó java ga quiahva ñā cachi i xihín ndo. ¹⁴ Mé da sátá tata cán cúú dá tátuhun da xíca cáhan tuhun Ndióxi xihín ñayivi. ¹⁵ Java ga ñayivi cúú ná tátuhun tata ñā nacuyu íchī. Taa johō na tuhun Ndióxi ta tá nandihī naxini johō na ñā já vaxi tiñáhá sacuahā ta cája rí xihín ná ñā ndíndójó na ñā. ¹⁶ Ta java ñayivi cúú ná tátuhun tata ñā nacuyu tañu yuu jáchī taa johō na tuhun Ndióxi ta cájī ini na ndíquehe na ñā. ¹⁷ Ta tá quiahva ndiává yucu sahá ñā cō ñúhu cúná yóho a quiahva já ndóho ñayivi tá casáhá ndicuita ñayivi cája xíxi na xihín ná. Ta tá casáhá ndóho ini na sahá tuhun Ndióxi ñā naxini johō na cán chí ivi laá jándacoo va na ñā cándeé ini na Ndióxi. ¹⁸ Ta java na cúú ná tátuhun tata ñā nacuyu tañu tohíñú jáchī taa johō na tuhun Ndióxi ¹⁹ joo ndícani ndivaha ini na sahá ñaha ñuyíví yóho. Cátóó ndivaha na ñaha cuíca chí jándahvi na mé ná xihín ñā cán ta xíca ini na cōo tóco ndihī ñaha nu ná. Ta cáva nuu táhan ñaha ñuyíví yóho xihín tuhun Ndióxi ini ínima ná sahá ñā cán queá cávitá ini na ta cō sáhnu na xihín tuhun Ndióxi. ²⁰ Joo ndúu java na xínī johō tuhun Ndióxi ta cándúsa na ñā. Ta

cája chúun vaha na xihin á ta já cuahnu na xihin á. Cúu ná tátuhun tata nacuyu nu ñuhú vaha. Java na cúu ná tátuhun tata ña nasahan oco uxu a nuú in in a. Ta java na cúu ná tátuhun ña nasahan uni jico uxu a ta java na cúu ná tátuhun ña nasahan in ciento a nuú in in tata —nacachi Jesús xihín na cán.

Sácú Jesús quiahva sahá in lámpara

(Lc. 8:16-18)

²¹ Ta cáchí tucu Jesús xihín ná:

—Coó toho chuun lámpara tá chícaan í ña tixi sato á tixi xito jáchí chuun ña queá cánúu ña nu jícó já ná jándiyehé ña nu yo. ²² Ni in túhún toho ñaha a cuú coo jehé jáchí xinú quivi já ndáca náha nu á. Ta ni in tuhun nacahan jehé ñayivi a cuú coo jehé nahá jáchí xinú quivi já candaa ini tóco ndihi ñayivi sahá tuhun nasahin jehé cán. ²³ Na ñin johó, ná cuni johó na —nacachi a.

²⁴ Ta cáchí tucu a já xihín ná:

—Candehé vaha ndó ña taa johó ndó. Tá quiahva cája ndó xihín ñayivi quiahva já caja Ndióxi xihín ndo joo chága ví caja mé á xihín ndo. ²⁵ Jáchí da sa ñin ñaha nuu, ñehé táhví dá coo chága ñaha nu dá joo da coó ñaha nuu, jandá ña chá ñin nu dá ndindaa —nacachi Jesús.

Jánaha Jesús nu ná ndá quiahva sáhnú tata

²⁶ Ta cáchí tucu Jesús já:

—Tá ndiquiahva ñayivi mé ná ndáha Ndióxi ña ná camí a cuéntá saha ná já cúu á tátuhun in dataa nachihin tata. ²⁷ Tá nandihí yáha quivi ta quíji da ta ndácoo da já yáha quivi xihín ñuú. Ta já ndúta mé tata cán ta sáhnú a joo mé da nachihin a cán coo xini da ndaja sáhnú a. ²⁸ Sáhnú a jáchí chuun nu mé ñúhu queá caja ña ná cuahnu ña cán. Jihna ñúhú ndúta mé yucu trigo já cana yóco a ta nu mé yóco a cán ndícutú ndaa ndíquí á. ²⁹ Ta tá nachíchi

mé ndíqui a cán já quée na cuahan na jáquee na ña jáchi naxinu coo quivi jáquee na ña —nacachi Jesús.

*Sácú Jesús inga quiahva saha ndíqui mostaza
(Mt. 13:31-32; Lc. 13:18-19)*

³⁰ Ta cáchi tucu Jesús já:

—Viti sácú u inga quiahva nu ndo já ná cándaá ini ndó ndá quiahva caja Ndióxi xihín ñayivi tá casáhá a cómi a cuéntá saha ná. ³¹ Cúú á tátuhun in ndíqui mostaza ña chíhin na nuú ñundáhyi. Cúú á ndíqui loho chága nu tóco ndihi ndíqui válí in ñuyívi. ³² Joo tá nandihí nachihin na a nasahnu a ta nanduu a in yíto, dó cáhnu nu ndíhi yíto. Ta xihín ndahá náhnu dó sácú do cáti ta janda laa ndíquehe ndée ri nu cáti do —nacachi Jesús.

*Sácú Jesús quiahva cuití va nuú ñayivi
(Mt. 13:34-35)*

³³ Najánaaha Jesús tuhun Ndióxi nu ná. Ta nasacu cuahá quiahva nu ná tátuhun ña yóho janda quiahva xinu nu mé ná cándaá ini na. ³⁴ Xihín mé quiahva cuití va najánaaha Jesús nuú ñayivi joo tá nacandoo Jesús xihín mé na xíca tuun xihín á já ndícani cáxi ndihi a ñaha nuú na cán.

*Tá najacatáji Jesús tañuhú tá ndícojo do
(Mt. 8:23-27; Lc. 8:22-25)*

³⁵ Tá nacuaá mé quivi cán já nacachi Jesús já xihín na xíca tuun xihín á:

—Cóho inga xoo tañuhú yóho.

³⁶ Anda já najándacoo na ñayivi já naquee na cuahan na xihín Jesús ini mé barco nuú sa ndácaan mé á. Ta ndáca táhan java ga barco cuahan dó xihín ná. ³⁷ Ta ndaja coo naxinu in tachi quíni ndivaha. Ta nacasáhá ndícojo tañuhú ndíhvi dó ini barco já nacasáhá ndícutú ticuí ini mé barco cán. ³⁸ Ta chí xoo jata mé barco cán

cándúhu Jesús quíji a ta cánúu jini á jatá ña yíhi jini ná. Já najándacaxí ini na mé á ta cáchi na já xihín á:

—Maestro. Chí cõ sáhní a mé á ña cúní ndihi saha yo jáchi sácõo barco cahá ticuif cuahan do —nacachi na.

³⁹ Anda já nandacõo Jesús ta nacasáhá jánani a tachi xihín tañuhú viti já cáchi a já:

—Catáji ndõ.

Já najáyaa tachi. Já nacandõo táji níí mé cán. ⁴⁰ Anda já nacachi Jesús xihín na xíca tuun xihín á:

—Ndávaaha nayihví nahá ndõ. Ndávaaha cõ cãndeé ini ndó yehe —nacachi a.

⁴¹ A juú quiahva nayihví mé na cán já nacasáhá cáhan xihín táhan na:

—Ndá da cúu dataa yóho ña janda tachi xihín tañuhú cándúsa nu cáhan da —nacachi na cán.

5

Tá nandaja vaha Jesús in da ndácaan ínima quini ini
(Mt. 8:28-34; Lc. 8:26-39)

¹ Anda já naxinu na inga xoo mé tañuhú cán nu ín ñundáhyi cuéntá Gadara. ² Ta tá nanuu Jesús barco cán já naquee in dataa camasanto já naxinu da nuú Jesús. Mé da yóho cúu dá da ndácaan ínima quini ini. ³ Ta ín va da nu ndúxu ndji ta ni in na a cuú cató na da ni xihín cadena a cuú cató na da. ⁴ Vatí cuahá tañu sa nacató na saha dá xihín ndáha dá joo sáhdá da cadena ta jácuachi da ña ta ni in na a cuú caja xihín dá. ⁵ Nuú ta ndiví xíca nuu da yúcu xihín nu ndúxu ndji cáyuhú da xíca nuu da ta jándicuehe da mé dá xihín yuu. ⁶ Joo tá naxini xíca da Jesús, ñihi chá nasahan da naxinu da nu ín a já nandicava xítí da nu á. ⁷ Ta cáyuhú cóhó da já cáchi da já xihín á:

—Ndá cuéntá quea vasún quihvi nuún xihín i. Yóhó cúun Jesús, da cúu in túhún jini já jahyi Ndióxi, ña cáhnu

ndivaha. Xíca t̄ahví i nuun ña ná a jándohún ini i —
n̄acachi da.

⁸ N̄acachi da ña yóho x̄ih̄in Jesús jách̄i n̄acasáhá sáhndá
mé á chuun nu rí quini cán já cách̄i a já:

—Ínima quini, janí da yóho.

⁹ Anda já n̄andaça t̄uhún Jesús mé rí quini cán já cách̄i
a já:

—Ndaja nanún.

Anda já n̄anducú ñehe da cán t̄uhun nu á já n̄acachi da
já x̄ih̄in á:

—Legión naní nde jách̄i cuaha cúu nde.

¹⁰ Ndáhv̄i mé xíca t̄ahví da cán nu Jesús ña ná a táv̄a x̄icá
a rí quini cuhun r̄i. ¹¹ Ta ndaja coo xíca nuu cuaha cóch̄i
x̄ixáhan rí yati yúcu cán. ¹² Sahá ña cán quea n̄ax̄ica t̄ahví
mé ínima quini cán nu Jesús já cách̄i r̄i já:

—Chindahá ndeh̄e ná cuhun nde ndih̄vi nde cóch̄i cáa.

¹³ Anda já n̄asahan Jesús ñaman̄i ta chí naquee ínima
quini n̄asañuhu ini da cán já n̄andih̄vi rí ini cóch̄i xíca nuu
cán. Ta tóco ndihi cóch̄i yóho x̄ínu rí cuahan rí nanuu rí
nu ndáyi já najáqueta nuu rí mé rí ini tañuhú chí n̄acandaa
rí ticuif̄i já n̄ax̄ih̄i rí. Tátuhun iv̄i mil cóch̄i n̄andih̄i saha.

¹⁴ Ta ndaja coo mé da ndáa cóch̄i cán naȳih̄vi da chí x̄ínu
da cuahan da caxi t̄uhun da ña nayaha yóho nuú ñayivi
ñuu Gadara x̄ih̄in nuú java ga na ndúu yati cán. Naquee
cuahá ñayivi mé cán candeh̄e na ña n̄acuu. ¹⁵ Tá n̄ax̄inu
coo na nu ín Jesús n̄ax̄ini na ín coo da n̄asañuhu cuaha rí
quini ini cán. Sa n̄andaça ndixi da jáhma ta sa n̄andicáxi
táhȳi ini da. Chí naȳih̄vi na. ¹⁶ Ta na n̄ax̄ini ña n̄acaja Jesús
cán n̄acasáhá na nd̄icani na nuú ñayivi ña n̄andoho dataa,
da n̄asañuhu rí quini ini cán x̄ih̄in ña n̄andoho cóch̄i viti.
¹⁷ Anda já n̄acasáhá na xíca t̄ahví na nu Jesús ña ná quee a
cuhun a.

¹⁸ Tá sa cuahān ndíhvi Jesús ini mé barco cán já naxinu da nasāñuhu rí quini ini cán já nacasáhá da xíca tahví da nu á ñā ná quiahva ñamaní nu dá cuhun da xihin á. ¹⁹ Joo coó nasahan Jesús ñamaní nu dá já nacachi a xihin dá:

—Cuanúhu vehún ta ndicani nuú nā vehún ndaja náhnu ñaha nacaja Ndióxi xuhun ta ndaja natahvi ini a sahun — nacachi a.

²⁰ Já naquee da cuahān da ta nacasáhá da ndicani da nuú ñayivi ndúu java ñuu cuéntá Decápolis tóco ndihi ña nacaja Jesús xihin dá. Chí cátóntó nā táa joho na ña.

Tá nandaja vaha Jesús jahyi jihí Jairo xihín in ñā nacani ndaa ndáha jáhma á

(Mt. 9:18-26; Lc. 8:40-56)

²¹ Tá nandihí nandihvi Jesús ini mé barco cán já naxinu coo a inga xoo tañuhú nuú naquixi a. Ta cán nanditútú cuahá ñayivi nu á mé yuhú tañuhú cán. ²² Já naxinu in da naní Jairo, da sáhdá chuun veñuhu. Tá naxini da Jesús nacaxítí da sahá. ²³ Ta ndáhví mé naxica tahví da nu á já cáchí da já:

—Xíhi jahyí i viti ñúhú. Caja ndó ñamaní ná coho vehe chinúu ndó ndáha ndó jata ña ná ndivaha ñá já ná catacu ñá —nacachi da.

²⁴ Anda já naquee Jesús cuahān xihin dá. Chí cándíhi táhan mé ñayivi ndíco nā jatá cuahān nā. ²⁵ Ta tañu ñayivi cán ndácaan in ñā quíhvi. Sa naxinu uxu ivi cuia ndítahví nii ña. ²⁶ Nandoho ndivaha ini ñā nuú nā cája tátá ñayivi ta sa najátivi ndihi ñā jiuhún ña cáttátá ña cuni ña. Joo a cuú ndivaha ñá ta jandá cája ndeé chága ví a xihin ña. ²⁷ Tá naxini joho ñá saha Jesús já cuahān ñá cayati ñá chí jatá tañu tóco ndihi ñayivi cuahān jata mé a cán. Ta nacani ndaa ndáha ñá jáhma á ²⁸ jáchi nacahán ña: “Tá ná cani ndaa cuití ndahá yo jáhma á já ndavaha í”, nacahán ña. ²⁹ Ivi laá nahichi nii ñá. Naxini cáxí ña nandivaha ñá ta

cuah̄an va cuehe nandoho ñá. ³⁰ Jári Jesús ivi laá nacandaa ini a ña nandivaha in ñayivi nacaja ndée mé á. Já nacasáhá sándehe a chí jaṭa tañu ñayivi. Já nacasáhá ndáca tuhún á na já cáchí a já:

—Ndá ndó nacani ndaa ndáha jahmá i.

³¹ Ta nanducú ñehe mé na xíca tuun xih̄in á cán tuhun nu á já cáchí na já xih̄in á:

—Sándehe vaḥa mé ndó ndá quiahva cándíhi táhan ñayivi vaḥi na xih̄in ndo ta cáa ga mé ndó ndáca tuhún ndó ndá na nacani ndaa ndáha jáhma ndo —nacachi na.

³² Joo cáva nuu nuu Jesús sándehe a ndá na nacani ndaa ndáha jáhma á. ³³ Ta mé ñá nandivaha cán tá nacandaa ini ñá ña nayaha já nacasáhá quíji ninu ñá sah̄á ña yíhvi ña. Já naxinu ñá nasaxítí ña nu Jesús. Anda já nacasáhá ña ndícani ñá nu á ndaja cáa ña nacaja ñá. ³⁴ Anda já nacachi Jesús já xih̄in ña:

—Jahyi a, nandivahún jáchi nacandúsun yehe. Cuanúhu ta a ndícani ga inún jáchi nandindaa cuehun —nacachi Jesús.

³⁵ Cáhan yji va Jesús xih̄in ñá cán tá naxinu java na naquixi vehe mé da sáhdá chuun veñuhu cán já nacachi na já xih̄in dá:

—Sa naxih̄i va jahyi ndó. A jáquihvi ga ndó da xíca jánaḥa ñayivi jan —nacachi na.

³⁶ Joo nacaja Jesús tátuhun co xini joh̄o a nuú nacahan na. Nacasáhá cáchí a já xih̄in da sáhdá chuun veñuhu cán:

—A cáyh̄ví tohún. Candúsa cuití vún yehe —cáchí a.

³⁷ Ta coó nasahan Jesús ñaman̄i nuú na cuaha ndúu cán cuhun na xih̄in á. Na nasahan cuití xih̄in á cúú Pedro xih̄in Jacobo xih̄in Juan, da cúú ñani Jacobo. ³⁸ Tá naxinu na vehe mé da sáhdá chuun veñuhu cán já naxini a ndíváá

ñayivi sácu ndivaha na cáyuhú na ndúu na cán. ³⁹ Já naquihvi a vehe ta já cáchí a já:

—Ndávaha ndíváá nahá ndo ta sácu cuaha ndo. Ta cóo naxihi toho ñáloho yóho joo quíji cuití va ñá —nacachi a xihín na cán.

⁴⁰ Joo nacasáhá na sácu ndaa na a. Anda já natavá Jesús tóco ndihi ñayivi jata véhe. Na naquihvi xihín á nasacuu tátá náná ña xihín na xíca tuun xihín á. Ta nacayati a nu cándúhu mé ñáloho cán. ⁴¹ Já natiin a ndáha ña ta nacasáhá cáchí a já xihín ña:

—Talita, cumi —nacachi a. Mé tuhun yóho cúni cachi a: Ñáloho cáhan i xuhun cuándacoo.

⁴² Ivi laá nandacoo ñáloho, ñá ndacaan uxu ivi cuiá ta nacasáhá ña xíca nuu ñá. Já nacatóntó tóco ndihi ñayivi. ⁴³ Joo nasahnda Jesús chuun nuú na ndúu cán ña ná a cáxi tuhun na ña nayaha yóho nuú java ga ñayivi. Ta nasahnda a chuun nu ná ña ná quiahva na ña cuxu mé ñáloho cán.

6

Íin Jesús ñuu a Nazaret (Mt. 13:53-58; Lc. 4:16-30)

¹ Naquee Jesús cuanúhu á ñuu a. Já naquee na xíca tuun xihín á cuahan na xihín á. ² Tá naxinu quivi ndíquehe ndée ná já nacasáhá Jesús jánaha ñayivi ini veñuhu cán. Ta cuahá ñayivi naxini joho nuú nacahan ta chí nacatóntó na ta ndáca tuhún xihín táhan na já cáchí na já:

—Ndájá nacatiahva nahá da yóho ña jánaha dá nu yo. Ndá naquixi ña ndíchí jini dá. Ndá naquixi ñaha xituhún cája da. ³ Á a juú da yóho cúu da cája chúun xihín yíto, da cúu jahyi María. Ta ñani da cúu Jacobo xihín José xihín Judas xihín Simón. Ta quiahva da jan ndúu ñuu yóho xihín mí —cáchí na ndáca tuhún táhan na.

Ta chí cōó naxeen na candúsa ñahá na. ⁴ Sahá ña cán queá naxachi Jesús já xihín ná:

—Vatí tóco ndihi ñayivi cája cáhnu na in profeta joo na vehe da xihín na ñuu da cō cándúsa na da —naxachi Jesús.

⁵ Chí cōó naxuu caja Jesús ña náhnu nuú na cán. Java va na quíhvi cuití va naxhinúu a ndahá jiní ná já nandaja vaha a na. ⁶ Ta chí naxatóntó Jesús sahá ña cō cándúsa na mé á. Sahá ña cán queá naquee Jesús cuahan jánaha ñayivi java ga ñuu válí ndúu yati cán.

Tá naxindahá Jesús uxu ivi na xíca tuun xihín á caxi tuhun na nuú ñayivi saha mé á

(Mt. 10:5-15; Lc. 9:1-6)

⁷ Tá najánditaca Jesús ndíhuxu ivi na xíca tuun xihín á cán já naxindahá a na tá ivi tá ivi cañehe táhan na cuhun na. Ta nasahan ndée nu ná ña ná cuu tavá na ínima quini ñúhu ini ñayivi. ⁸ Ta nasahnda a chuun nu ná ña ná a cañehe toho na ñaha cuhun na íchi. In túhún ña cuu cañehe na cuhun na cúu in garrote, dó tiin ndaa na. Joo a cūú cañehe na ni yátí ni pan ni jjuhún. ⁹ Ndítahan cayihi na ndusa ta in túhún cotó na ndítahan candixi na cuhun na. ¹⁰ Ta naxachi a já xihín ná:

—Tá ná xinū cōo ndó in vehe, canduu ndó mé vehe jan anda quiahva xinū quiví quee ndó cuhun ndo. ¹¹ Ta ndá ñuu cō cúní na ndiquehe vaha na ndohó ta ni cō cúní na taa johó na nu cáhan ndo já queá cuáhán queta ndó cuhun ndo ta catí ndó ña yácá saha ndo já ná ñaha ña cuahan cuachi na cán jata mé va na. Mé a ndaa ná cahan i xihín ndo ña tá ná xinū quiví caja vií Ndióxi sahá ñayivi ndúu ñuyiví já queá jándoho chága Ndióxi ini ñayivi ñuu jan sahá ña cōo nandiquehe na ndohó a juú ga tá quiahva najándoho a ini na ñuu Sodoma xihín Gomorra sanahá —naxachi Jesús xihín ná.

¹² Andá já naquee mé nā xíca tuun xih̄in á cuah̄an na caxi tuhun na nuú ñayivi ñā ndítahan nu ná ndicó cōo ini na jándacoo na cuachi cája na. ¹³ Ta natavá cuah̄a ná ínima quini nasañuhu ini ñayivi ta tá naxojo na sítí jiní ñayivi quih̄vi já nandivaha na.

*Tá naxih̄i Juan, da nacaja ndúta ñayivi
(Mt. 14:1-12; Lc. 9:7-9)*

¹⁴ Nañehe Herodes, mé da cómi cuéntá sah̄á ñayivi cán tuhun sah̄á Jesús jáchi níi cúu nandicuīta nuu tuhun sah̄á. Ta já cáchi Herodes já sah̄a Jesús:

—Á a juú Jesús cúu á Juan, da najácandúta ñayivi ta viti nanditacu tucu da. Sah̄á ñā cán queá ín ndéé da cája da tóco ndihi ñā cája da yóho —cáchi da.

¹⁵ Ta java na cáchi nā já:

—Á a juú da yóho cúu Elías, da nasacuu profeta.

Ta java na cáchi nā já:

—Á a juú da yóho cúu in profeta tátuhun nā profeta nasanduu sanahá ndivaha.

¹⁶ Tá naxini joh̄o Herodes ñā yóho já nacasáhá cáchi da já:

—Jivi ndusa da yóho cúu Juan, da najácandúta ñayivi, da nasahnda i chuun ná chitúhun ná jico dá joo viti nanditacu tucu da —nacachi da.

¹⁷ Jáchi mé Herodes yóho sa nasahnda da chuun ñā ná tiin na Juan, da najácandúta ñayivi ta nacató nā da já nachicaan nā da vecaa. Nacaja da ñā yóho sah̄á Herodías, ñā nasacuu ñájíhí Felipe, ñani mé Herodes jáchi sa naquehe Herodes ñā cacuu ñā ñájíhí mé dá. ¹⁸ Ta natiin Herodes mé Juan jáchi já nasacahan Juan já xih̄in dá:

—Cō ndítahan cóun xih̄in ñájíhí ñanún —nacachi da.

¹⁹ Sah̄á ñā cán queá naxojo ini Herodías xih̄in Juan. Ta cúní ñā cahní ñā da joo a cúu caja ná. ²⁰ Jáchi yíhvi

Herodes Juan sahá ña xíni da ña cúu Juan in taa ndaa, da co cája cuachi. Ña cán quea coo nasahan Herodes ñamaní nu mé Herodías caja ñá ña núu xihín dá. Ta taa johó Herodes nu cáhan Juan vatí cáhvi ivi johó ini da sahá ña xíni johó da joo cájii ini da taa johó da nu cáhan da. ²¹ Joo in quivi nanuna nu Herodías cahní ña Juan jáchi nacaja Herodes in víco cuéntá quivi nacacu da. Mé já nacana da da náhnu ndúu nu dá ña ná quixi na cuxu na xihín dá. Ta nacana da tóco ndihi na cúu sacuaḥa nuú soldado xihín tóco ndihi ñayivi ín saḥa estado Galilea. ²² Ta ndaja coo ñá cúu jahyi jíhi Herodías naquihvi ñá nu ndúu na xíxi na ta nacasáhá ña xíta sahá ña nuú ndihi na cán. Ta nacatóo Herodes xihín na ndúu xíxi xihín dá ndá quiahva naxita sahá ña sahá ña cán quea nacachi Herodes xihín ña:

—Ndía cúni mún, cacún ña nuú i jáchi quiahva i ña nuun —nacachi da.

²³ Ta nasahan da tuhun da nu ñá cán ña quiahva da tóco ndihi ñaha ná cacá ñá nu dá vatí ñahño táhvi ndaa ñundáhyi ña cómi da chuun saḥa nacachi da quiahva da nu ña. ²⁴ Já naquee ñá cán cuahan ña caxi tuhún ña nu náná ña ña nacachi Herodes xihín ñá. Ta nandaca tuhún ñá náná ña ndía cacá ñá nu dá ta já nacachi mé náná ña já xihín ña:

—Caca yiquí jíni Juan, da jácandúta ñayivi —nacachi Herodías.

²⁵ Ta cama chá naquihvi tucu ñá cán nu ndacaan Herodes já cáchi ña já xihín dá:

—Viti ñúhú cúni ña ná quiahva mé ndó yiquí jíni Juan, da jácandúta ñayivi nuú i ini in cohó cáhnu —nacachi ñá.

²⁶ Ta ndaja coo nacasáhá nacacuéha ndivaha ini Herodes sahá ña naxica ñá cán yiquí jíni Juan. Joo sahá ña sa nasahan da tuhun da nu ña ta sa naxini johó tóco ndihi na ndúu xíxi xihín dá cán ña nacachi da xihín ña

sahá ña cán quea ndúsa caja da ña cuni ña. ²⁷ Chí ivi laá nachindahá da in soldado veca ña ná cañehe da yiquí jini Juan quixi a. ²⁸ Naxinu soldado cán veca já nachituhun dá jico Juan já ñehe da ña ini in cohó cáhnu já nandiquiahva da ña nu ña cán já nandiquiahva ña a nu náná ña.

²⁹ Tá nacandaa ini na naxica xihin Juan ña nacaja na xihin dá já nasahan na nandiquehe na yiquí cuñu da já najánduxu na da.

*Tá nasahan Jesús ña cuxu uhun mil taa
(Mt. 14:13-21; Lc. 9:10-17; Jn. 6:1-14)*

³⁰ Tá nandihí já nandique táhan tucu na xica tuun xihin Jesús xihin á já nacasáhá ndícani na nu á ña nacaja na xihin ña najánaha na. ³¹ Já nacachi Jesús xihin ná:

—Naha ndó ná cohó ndiquehe ndée loho í nu cáa xóo.

Nacachi a já xihin ná jáchi cuahan vaxi ñayivi xica nuu cuaha chá na mé cán ta chí co sáhan na ñamaní cuxu na. ³² Anda já nandihvi Jesús xihin na xica tuun xihin á ini in barco já naquee na cuahan na in nu cáa xóo. ³³ Joo cuahá ñayivi nandicuni na Jesús tá naquee a cuahan. Já xínu cuahá ñayivi tá nuú ñuu cán cuahan sáhá na xoo nuú cuahan Jesús ini barco. Ta jihna ga mé ná naxinu yuhú tañuhú cán a juú ga Jesús. ³⁴ Tá nanuu Jesús barco cán já naxini a cuahá ndivaha ñayivi. Já ñatahvi ini a saha ná jáchi tá quiahva ndúu ndicachi, rí coó xitoho quiahva já ndúu na. Anda já nacasáhá jánaha cuahá ñaha nu ná. ³⁵ Ta tá sa cáhini cuahan naxinu na xica tuun xihin á já cáchi na já:

—Sa nahini va ta a juú xoo nu ndúu ñayivi quea yóho.

³⁶ Ndindayí ndó ñayivi ná cuhun na ñuu válí xihin nuú yati yóho já ná cueen na ña cuxu na —nacachi na xica tuun xihin Jesús.

³⁷ Tá nandihí já nanducú ñehe Jesús tuhun já cáchi a já:

—Mé ndó quiahva ndó ná cuxu na —ñacachi Jesús xihín na cán.

Ta ñacachi na já xihín á:

—Ndá cuu caja nde quiahva nde ña cuxu na yóho jáchi jjuhún cuahá ndivaha xíní ñúhú nde já cuu cueen nde pan cuxu ñayivi cuaha yóho. Ta ni a quéta toho ivi ciento denario —ñacachi na.

³⁸ Já ñacachi tucu Jesús já xihín na cán:

—Ndaja pan cómi ndo. Cuahán ndo candehé ndo.

Tá ñasahan na sándehe na já cáchi na já xihín á:

—Íin uhun pan xihín ivi tiyacá.

³⁹ Anda já ñasahnda Jesús chuun nu ná ña ná jácacoo na ndihi ñayivi tá táhnda nuú yucu cuí cán. ⁴⁰ Ta ñasacoo na java táhnda in ciento na ta java táhnda ivi jico uxu na.

⁴¹ Anda já ñatiin Jesús ndíhuhun pan xihín ndíví tiyacá ta sándehe a indiví já ñandiquiahva ndixahvi nu Ndióxi. Ta ñasahnda java pan já ñasahan ña nuú na xíca tuun xihín á já ná ndicahnda na ña nuú ñayivi. Tá quiahva já ñasahnda tiyacá já ñanditahnda rí nu tóco ndihi ñayivi cán. ⁴² Já ñaxixi tóco ndihi ñayivi cán ta ñachutú tixi ndihi na. ⁴³ Ta mé pan xihín tiyacá ña ñacandoo ñaxixi na najáchutú na uxu ivi toyicá. ⁴⁴ Ta ñaxixi uhun mil dataa cán.

Tá ñaxíca sáhá Jesús nuú tañuhú

(Mt. 14:22-27; Jn. 6:16-21)

⁴⁵ Tá ñandihí ñacaja Jesús ña ná ndihvi na xíca tuun xihín á ini in barco ña ná cuhun cuéé na inga xoo tañuhú já xinu na Betsaida nani ndíndayí a ñayivi já sa mé á cán ndique táhan xihín ná. ⁴⁶ Ta tá sa ñandíndayí ndihí a ñayivi ñaquee a cuahan yucu caca tahví a nu Ndióxi. ⁴⁷ Tá ñacuaá sa ndácaan barco mahñú tañuhú cán ta Jesús íin yí va nu ñúhu. ⁴⁸ Ta ñaxini a ña ndóho ini na xíca tuun xihín á jáchi a cuú jácaca na barco ini ticuíf jáchi mé xoo nuú cuhun na vaxi tachi. Tá sa cuahan tívi já xíca sáhá

Jesús cuahān nuú ticuúí xoo nu ndúu na ta tá nācayati a nu ndúu na jalóho yaha saa cuhūn a, nduu. ⁴⁹ Joo tá naxini na xíca sáhá Jesús nuú ticuúí nācāhān nā cúú á in ínimā já nācayuhú cóhó nā. ⁵⁰ Jáchi tóco ndihi nā naxini ñahá nayihví nā. Joo nādicahān Jesús já cáchi a já:

—Ndacú coo ini ndó jáchi yehe va cúú u. A yíhvi toho ndó —nācachi Jesús.

⁵¹ Tá nāndaa Jesús jāta barco nu cándójó nā já najáyaa tāchi. Chí nācatóntó mé nā xíca tuun xihín á cán. ⁵² Jáchi a ñáha tācu vaha ini na sáhá ñā nācāja Jesús tá nāndaja cuahā mé á pan xihín tiyacá jáchi nāndaji tuun xíní túní ná.

Tá nāndaja vaha Jesús nā quíhvi ndúu ñundáhyi Genesaret (Mt. 14:34-36)

⁵³ Naxinu nā inga xoo tañuhú ta nācató ndaa na barco yuhú tañuhú cán já nāsaa nā ñundáhyi Genesaret. ⁵⁴ Tá quéta Jesús xihín nā xíca tuun xihín á ini barco cán ivi laá nādicuni ñayivi mé á. ⁵⁵ Já xínu na cuahān nā ndijáá ñuu válí ndúu yati cán ndúcú nā nā quíhvi já ñéhe na nā nuú xito cásaa nā nu Jesús. ⁵⁶ Ta ndá ñuu nācuu nu quíhvi Jesús cúú á ñuu náhnu á ñuu válí á yúcu já quéta ñayivi sácú nā nā quíhvi yuhú íchi. Ta já xíca tāhvi nā nu Jesús ñā ná quíahva ñamaní cani ndaa ndáha ná a vatí loho yuhú jahmá a. Ta ndá nā nācāni ndaa ndáha mé á ivi laá nāndivaha na.

7

Ñā cája quini ínimā ñayivi (Mt. 15:1-20)

¹ In tañu nā fariseo xihín java nā jánaha ley Moisés, nā nāquixi ñuu Jerusalén nācayati na nu íin Jesús. ² Ta nāxojō ini na tá naxini na ñā ndúu coo java nā xíca tuun xihín Jesús xíxi na tá cámaní ndahá nā tá quíahva íin costumbre

na Israel. ³ Jáchí jánaha na fariseo xihín ndihi na Israel ña a cuú cuxu na tá cámaní ndahá vaha na tá quiahva ín costumbre tásáhnú jícó na. ⁴ Ta jári jánaha na ña tá ndícó coo na sáhan na yahvi xíní ñúhú ndahá na tá quiahva ín costumbre na já ná cuu cuxu na. Ta ín cuahá ga nuú ñaha jánaha na ndítahan caja na tátuhun ña ndícata na yáxi xíhi na xihín tindohó xihín cohó caa anda xito quiji na viti, ndítahan ndicata na. ⁵ Anda já ñacasáhá na fariseo xihín na jánaha ley Moisés cáchí na já xihín Jesús.

—Ndávaha co cája na xíca tuun xuhun tá quiahva ñacachi tásáhnú jícó yo caja í. Ndávaha xíxi na tá cámaní ndahá na tá quiahva sáhdá ley caja í —ñacachi na. ⁶ Já ñacachi Jesús já xihín ná:

—Mé a ndaa ñacahan profeta Isaías saha ndo jáchi co cúu ndó tá quiahva ndáa ndó.

Já ñacahyí da já:

Yuhú ninu uun na cája cáhnú na yehe.

Ta co cája cáhnú na yehe xihín ndinuhu ínima ná.

⁷ Mé a uun va quéa cája cáhnú na yehe, jáchi ña jánaha na nuú ñayivi cúu á ña quixi jiní mé cuití va na, ñacahyí Isaías sanahá.

⁸ Jáchí najándacoo ndó ña ñasahnda Ndióxi nu ndó caja ndó ta ñacasáhá ndícó cáhnú ndó costumbre ña ñacaja tásáhnú jícó ndó. Ta sahá ña yóho ndícata ndó tindohó xihín yáxi xíhi ndó ta cája ndó cuahá chága costumbre yatá —ñacachi Jesús xihín ná.

⁹ Já ñacachi tucu a já xihín ná:

—Sahá ña cúni ndo candico cáhnú ndó costumbre mé va ndó sahá ña cán quéa najándacoo ndó ña ñasahnda Ndióxi caja ndó. ¹⁰ Jáchí já cáchí ley Moisés: “Caja cáhnún tátún xihín nánún”, ta jári cáchí a já: “Ndá na ná chican chahan jata tátá na á jata náná na, ndítahan quivi na”, cáchí ley Moisés. ¹¹ Joo ndóhó jánaha ndó nuú ñayivi ña

cuu caḥan na já xih̄in tátá na á náná na: “A cuú chindee e ndóhó jáchi sa nasacu xoo i ñaha i quiahva i ña nu Ndióxi”, cáchi na. ¹² Tá ná cachi na ña yóho já quea co ndúsa ga chindee na tátá na á náná na. ¹³ Quiahva johu cája ndó sácu xoo ndó ña nasahnda Ndióxi nu ndo ta ndája ndó a tátuhun in ñaha ña coó saha. Jáchi ndíco cáhnu ndó costumbre ña najándadacoo tásáhnu jícó ndó nu ndo ta quiahva já jánaha ndó nuú jahyi ndó. Ta cuahá ga ñaha tátuhun ña yóho cája ndó —nacachi Jesús.

¹⁴ Anda já nacana tucu Jesús ñayivi já nacachi a já xih̄in ná:

—Cuni johu ndihi ndó nu cáhan i xih̄in ndo ta candaa ini ndó ña. ¹⁵ Ni in ñaha xíxi ñayivi a cuú caja quini ínimá ná. Ña cuu ndaja quini ñayivi cúú ña quixi ínimá na tátuhun ña cáhan na xih̄ín ña cája na. ¹⁶ Na ín johu, ná cuni johu na —cáchi Jesús.

¹⁷ Tá nandihhi nandihvi Jesús ini in vehe ta nacandoo cuahá ñayivi jata véhe. Já nandaca tuhún na xíca tuun xih̄in á ña ndía cuni cachi a xih̄ín tuhun nacahan xih̄in ná. ¹⁸ Ta nanducú ñehe a tuhun nu ná já nacachi a já:

—Á coó toho xíní túni ri ndóhó va, vaḥa. Jáchi co cánda ini ndó ña tóco ndihi ñaha xíxi ñayivi a cuú caja quini a na. ¹⁹ Jáchi ña xíxi ñayivi co xínu a ini ínimá ná joo xínu co a tixi na já queta tucu a yiquí cuñu na —nacachi Jesús.

Xih̄ín tuhun yóho nacachi Jesús xih̄in ná ña cuu cuxu na tóco ndihi ñaha ña xíxi ñayivi jáchi co ndája quini a ínimá ná. ²⁰ Ta nacachi tucu Jesús já:

—Ña cuu ndaja quini ñayivi cúú ña quixi ínimá ná tátuhun tuhun cáhan na xih̄ín ña cája na. ²¹ Jáchi chí ini ínimá ná queta ña cáhvi núu ini na tátuhun ña cáhvi ini in dataa coo da xih̄in ñájíhí ñani táhan da á tá xíca ini da coo da xih̄ín in ñáñáha, ña co cúú ñájíhí da á tá cáhvi ini na cahní na ndij. ²² Ta sa mé cán queta ña xíca ini na caja

cuíhná nā ta jári xíçā ini na coo cuahá ndivaha ñaha nu ná. Ta sa mé cán quéta ña núu cája na ta cáhan nā ña tuhún ta cája na tá nuú cuachi ta cáhiví ini na ta cátóo nā cahan nā saha táhan na ta cája cáhnu na mé ná ta quíhví cája na. ²³ Tóco ndihi ña núu yóho ña cáhvi ini ñayivi caja na, quíxi a ínima ná ta ndája quini a nā.

Tá naçandee ini in ñá tóho Jesús

(Mt. 15:21-28)

²⁴ Já naçee Jesús cuahan chí ñundáhyi cuéntá Tiro xihín Sidón. Ta naquihvi a in vehe coo a ta co cúní a ña ná candaa ini nā ñuu ña iin a cán joo coo naçuu coo jehé a. ²⁵ Chá va ta naçandaa ini in ñáñáha ña iin Jesús vehe cán. Ta iin in jahyi jíhí ña, ñá ndácaan ínima quini ini. Ta ndaja coo naçaa ñá ta naçaxítí ña saha Jesús. ²⁶ Ta cúu ñá ñá tóho cuéntá ñundáhyi Sirofenicia. Ta naçica tahví ñá nu Jesús ña ná tavá a ínima quini ndácaan ini jahyi ñá. ²⁷ Anda já naçachi Jesús já xihín ña:

—Jihna ñúhú ndítahan nuú i chindee e na Israel anda jáví cuu chindee e ndohó, nā tóho jáchi iin in tuhun ta cáchí a ña a váha toho candaa í pan xíxi nā valí ta jácana í ña nuú tina —naçachi Jesús.

²⁸ Anda já naçachi mé ñá tóho cán já xihín Jesús:

—Mé a ndaa cáhan ndó, xitoho. Joo anda tina, rí ndúu tixi mesa xíxi rí ña jácuyu jahyi xitoho rí —naçachi ñá.

²⁹ Anda já naçachi Jesús já xihín ñá:

—Vaha va naçahun. Sahá ña cán quea cáchí i xuhun cuanúhu viti jáchi sa naçqueta va ínima quini naçandacaan ini jahyún —naçachi Jesús.

³⁰ Ta tá naçinu ñá vehe já naçini ñá cándúhu jahyi ñá nuú xito ta sa coo ga ínima quini cán ndácaan ini jahyi ñá.

Tá nañdaja vaha Jesús in da jóho, da a cuú cahan

³¹ Naquee Jesús ñundáhyi cuéntá Tiro ta nayaha chí ñuu Sidón xihín java ga ñuu cuéntá Decápolis cán já naxinu coo a tañuhú Galilea. ³² Cán ñéhe na in dataa nacasaá na nu Jesús. Cúu dá da jóho ta cúu dá da níhi. Ta naxica na nu á ña ná chinúu a ndáha á jini dá já ná ndivaha da. ³³ Já natavá xóo Jesús da tañu ñayivi cán. Já najáquihvi a in nducu ndáha johu da ta naxihnu a tójijí a já nacani ndaa a tójijí a yáa dá. ³⁴ Tá nandihí nasandehé a indiví já ndísaa ndísaa ínima á já nacachi a já xihin dá:

—Efata —nacachi a ta ña yóho cúnj cachi: Ná ndinuna.

³⁵ Ivi laá nandinuna johu mé da jóho cán ta nandivaha yáa dá já nacasáhá cáhan vaha da. ³⁶ Ta nasahnda Jesús chuun nuú ndihí na ña ná a cáxi tuhun na ña yóho nuú ni in ñayivi. Joo tá nacachi a ña yóho já queá ví ga ví cáhan na. ³⁷ Chí cátóntó ndihí ñayivi tá xini johu na ña ta cáhan xihin táhan na já cáchí na já:

—Vaha ndivaha cája Jesús tóco ndihí ñaha jáchi jánditacu a na jóho ta jándicahan mé á na níhi —nacachi na.

8

Tá nasahan Jesús ña cuxu comi mil ñayivi (Mt. 15:32-39)

¹ Mé já nanditútú tucu cuahá ñayivi ta chí coo mé ñaha cuxu na. Anda já nacana Jesús na xica tuun xihin á já nacachi a já xihin ná:

² —Táhnda ndivaha ini i sahá ñayivi yóho jáchi sa naxinu unj quivi ndúu na xihín i yóho ta chí coo ga ñaha cuxu na. ³ Ta co cúnj chindahá i na nuhu na vehe na jáchi cámanj cuxu na ta tiahva náá cuitá na ta cuyu na íchi jáchi sa cánj ndivaha naquixi java na —nacachi Jesús.

⁴ Anda já nacachi na xica tuun xihin á cán já:

—Ndaa cáhan ndo. Ta ni mí, a cuú quiahva í ña cuxu na jáchi coó toho ñayivi ndúu yóho nuú cueén ña cuxu na —nacachi na.

⁵ Anda já nandaca tuhún Jesús na já cáchi a já xihin ná:

—Ndaja pan cómi ndo.

Já nacachi na cán já:

—Usa ña.

⁶ Anda já nasahnda Jesús chuun nuú ñayivi ña ná cacoo na nu ñúhu. Já natiin a ndihusa pan cán. Ta nandiquiahva ndixahvi nu Ndióxi. Já nasahnda java ña ta nasahan ña nuú na xíca tuun xihin á cán ña ná ndicahnda na ña nuú ñayivi cuaha cán. ⁷ Ta jári nasacomí na java tiyacá válí ta nandiquiahva mé á ndixahvi nu Ndióxi saha ri já nasahnda chuun nu ná ña ná ndicahnda na ri. ⁸ Ta naxixi tóco ndihi na ndúu cán anda quiahva nachutú tixi na ta tá nandihí najácutú na janda usa toyicá xihin ña nacando. ⁹ Tátuhun comi mil ñayivi naxixi. Ta tá nandihí já najándindayí Jesús na. ¹⁰ Já nandihvi a ini barco xihin na xíca tuun xihin á já naquee na cuahan na ñundáhyi cuéntá Dalmanuta.

Cúni na fariseo ña ná caja Jesús in ña xituhún nu ná

(Mt. 16:1-4; Lc. 12:54-56)

¹¹ Anda já naxinu na fariseo nu Jesús já nacasáhá ndítuhún na xihin á. Ta sahá ña cúni na coto ndojó cuití ñahá na sahá ña cán quea naxica na nu á ña ná caja in ña xituhún, ña quixi indiví já ná candaa ini na á mé a ndaa cúu á ña nachindahá Ndióxi. ¹² Ndísaa ndísaa ini Jesús jáchi ndíhi ini a xihin ná já cáchi a já:

—Ndá saha quea xíca na yóho ña ná caja i in ña xituhún. Mé a ndaa ná cahan i xihin ndó ña a cája i ñaha xituhún nuú na yóho —nacachi a.

¹³ Anda já nandihvi tucu Jesús ini mé barco cán ta najándacoo a na cán já naquee a cuahan inga xoo tañuhú.

Tá cáhan Jesús sahá ña jánaha na fariseo

(Mt. 16:5-12)

¹⁴ Ta ndaja coo nandindójó mé na xíca tuun xihín a cán cañehe na ñaha cuxu na joo ñasahiin in pan cuití va xihín ná ini barco cán. ¹⁵ Anda já ñasahnda Jesús chuun nu ná já cáchí a já xihín ná:

—Candehé ndo. Cuéntá coo ndó xihín na fariseo ta xihín na cúú cuéntá Herodes jáchi ña jánaha na cúú á tátuhun yusa naxaa ña cáva táhan na xihín harina cávaha na pan —ñacachi Jesús.

¹⁶ Coó ñacandaa ini na ña cáchí a ña cán quea ñacasáhá ndítuhún xihín táhan na já cáchí na já:

—Sahá ña coó pan ñehé vaxí sahá ña cán quea cáhan Jesús ña yóho xohó —ñacachi na.

¹⁷ Sa ñacandaa ini Jesús ña cáhan na ta já ñacasáhá cáchí a já:

—Mé ndó cáchí ndó ña coó pan ñehé vaxí jáchi co cánda ini ndó ta ni co cája ndó cuéntá sahá ña jánaha i. Nandaji tuun xini túni ndo. ¹⁸ Cúú ndó tátuhun na co tívi nuu xihín na coó johó jáchi vatí xini ndo ta xini johó ndó joo co cánda ini ndó. Á co ndícuhun ini ndó ña ñacaja i ¹⁹ tá nandicahnda i ndíhuhun pan nuú uhun mil taa. Ndaja toyicá nanditaca ñacaja ndó xihín ña ñacandoo cán —ñacachi Jesús.

Já nanducú ñehe na tuhún nu á:

—Uxu ivi ña.

²⁰ Ta ñacachi tucu Jesús xihín ná já:

—Ta tá nandicahnda i usa pan nuú comi mil ñayivi, ndaja toyicá nanditaca ñacaja ndó xihín ña ñacandoo —ñacachi a.

Já nanducú ñehe na tuhún nu á:

—Usa ña.

²¹ Anda já ñacachi a já xihín ná:

—Cámanj yij va cándaaj ini ndó —nācachi a.

Tá nandaja vaha Jesús in da cuáá ñuu Betsaida

²² Tá nandihij naxinuj na ñuu Betsaida já ñéhe na in da cuáá nacasaa na nu Jesús. Já naxica tǎhví na nu á ña ná cani ndaa ndáha á da. ²³ Ta chí natiin a ndáha da cuáá cán já nǎtavá a da yuhú ñuu. Nāchindaa tójií a nduchú núú da já nāchinúu a ndáha á jiní dá. Já nandaca tǎhún a da á cuu candehé da. ²⁴ Ta já nācachi da cán já sǎndehé da:

—Sǎndehé e java taa joo tá quiahva ndaa yító quiahva já ndaa da xíca nuu da xíní i —nācachi da.

²⁵ Anda já nāchinúu tucu Jesús ndáha á nduchú núú da já nasandehé ndaa da. Anda jáví nandivaha nduchú núú da ta nacasáha sǎndehé cáxí vaha da tóco ndihij ñaha. ²⁶ Ta nāchindahá Jesús da cuanúhu da vehe da já nācachi a já xihij dá:

—A ndíhvún mahñú ñuu ni a ndícanún ña yóho nuú ñayivi ndúu jan —nācachi a.

Tá cáxi tǎhun ndaa Pedro ña cúú Jesús mé a nāchindahá Ndióxi cacomí cuéntá sahá ñayivi

(Mt. 16:13-20; Lc. 9:18-21)

²⁷ Tá nandihij já nasahan Jesús xihín na xíca tuun xihij á ñuu válí ndácaan Cesarea cuéntá Filipino. Nani xíca na cuahan na íchi nandaca tǎhún a na já cáxí a já xihij ná:

—Ndá da cáxí ñayivi cúu yehe —nācachi a.

²⁸ Já nācachi na cán já:

—Java na cáxí na ña cúú ndó Juan, da nācaja ndúta ñayivi. Ta java na cáxí na ña cúú ndó profeta Elías. Ta java na cáxí na ña cúú ndó in táhan profeta nasanduu sanahá —nācachi na.

²⁹ Anda já nandaca tǎhún tucu Jesús na já cáxí a já xihij ná:

—Ta ndóhó ri, ndá da cáxí ndo cúu u —nācachi a.

Anda já nācachi Pedro já xihij á:

—Mé ndó cúú Cristo, mé a nāchindahá Ndióxi cacomí cuéntá sahá ñayivi —nācachi da.

³⁰ Andá já nasahnda Jesús chuun nu ná ña ná a cáxi tuhun na ña yóho nuú ni in ñayivi.

Cáxi tuhun Jesús ña quivi a

(Mt. 16:21-28; Lc. 9:22-27)

³¹ Andá já nācasáhá jáñahá Jesús nu ná ña tandaa quiví ndoho ndivaha ini mé á, da nāchindahá Ndióxi nduu ñayivi. Ta nā sacuahá veñuhu xihín nā sacuahá nuú jutu xihín nā jáñahá ley Moisés candají nā mé á janda quiahva ná cahní ñahá nā. Joo tá ná xinu uní quiví nditacu tucu a.

³² Cáxi ndivaha nācahan Jesús ña yóho xihín ná ta chí anda já natavá xóo Pedro Jesús já nācasáhá jáñani da a sahá ña nācachi a xihín ná. ³³ Joo nācava Jesús ta nāndicoto nihni a nuú nā xíca tuun xihín á já nācasáhá ndícuēhe a xihín Pedro já cáchi a já xihín dá:

—Cuáhán quee Satanás, rí cúú tiñáhá sacuahá. Co ín xíní túnun tá quiahva ín xíní túní Ndióxi jáchí cáhvi inún tá quiahva cáhvi ini ñayivi ñuyíví yóho —nācachi a.

³⁴ Andá já nācana Jesús nā xíca tuun xihín á xihín java ga ñayivi já nācachi a já xihín ná:

—Ndá nā cúní candico yehe ndítahan nu ná ndíhi chága ini na sahá yehe a juú ga saha mé ná. Ta ndítahan coo tiahva na ndoho ini na sahá yehe. Ta coo caja toho a ná quivi na sahá i. ³⁵ Jáchí ndá nā cátóo coo chága ñuyíví yóho ndíhi saha ná. Joo ndá nā sáhan ndeé ini quivi sahá i xihín sahá tuhun Ndióxi, ñehe táhvi ná catacu na anda ama cáa quiví. ³⁶ Vatí ná quee vaha in na ñuyíví yóho ta cómí nā tóco ndíhi ñaha ñuyíví joo ndá chuun queá tá nu ndíhí ndíhi saha ná indayá. ³⁷ Jáchí ni in ñaha a cuú chahvi in na saha ínimá ná ná a cūhun nā indayá. ³⁸ Candehé ndo. Mé tiempo viti cája ñayivi cuahá cuachi ta co xéen na caja na ña sáhdá Ndióxi nu ná. Ta ndá nā cácan nuu sahá i

xih̄in sahá tuhun vaḥa cáḥan i quiaḥva já cacahan ri nuú yeḥe, ḍa nachindahá Ndióxi nduu ñayivi sahá na cán tá ná quixi i cacomí i cuéntá sahá ñayivi. Mé tiempo cán naḥa ndaja cáḥnu cúú yeḥe jáchi quixi i xih̄in ndée Ndióxi ta xih̄in ndée táto yij mé á viti —naçachi Jesús.

9

¹ Ta naçachi tucu Jesús já xih̄in ná:

—Mé a ndaa ná caḥan i xih̄in ndo. Java na ndúu yóho a quiví toho na janda quiaḥva ná xinu quivi cuni na cacomí Ndióxi cuéntá sahá ñayivi xih̄in ndée mé á —naçachi a.

Tá nandijama Jesús quiaḥva cáa

(Mt. 17:1-13; Lc. 9:28-36)

² Tá nayaha iñu quivi já nandaa Jesús in yucú jícó ta ndáca táhan Pedro xih̄in Jacobo xih̄in Juan cuah̄an na xih̄in á. Ta nu táhyí mé na cán nandijama quiaḥva cáa. ³ Ta a juú quiaḥva nandiyeh̄e jáḥma ndíxi a chí nandiyaa cachi ña. Ni in ñayivi ñuyiví yóho a cuú ndicata yaa nahá jáḥma tá quiaḥva yaa nanduu jáḥma á. ⁴ Anda já na xíca tuun xih̄in Jesús naçini na Elías xih̄in Moisés ndúu na ndítuhún na xih̄in á. ⁵ Ta já naçachi Pedro já xih̄in Jesús:

—Maestro, vaḥa cúu ndúu nde yóho jáchi já cuu cavaha nde uni vehe tiyahvá válí. In a coo mé ndó ta inga coo Moisés ta inga coo Elías —naçachi da.

⁶ Nayihví ndivaha na xíca tuun xih̄in Jesús sahá ña cán quea co xini mé Pedro ndía cáa cáḥan va da. ⁷ Anda já nanuu in vico jata ná já najáhvi a na ta tañu vico cán naçini joh̄o na ña cáḥan in a já cáchi a já:

—ḍa yóho cúú jahyi maní i. Cuni joh̄o ndó nu cáḥan ḍa.

⁸ Ta tá nandicoto nihni na sa coo ga na naçini na ta jandá in túhún Jesús naçini na.

⁹ Tá sa cuah̄an nuu na jini yucu cán já naçahnda Jesús chuun nu ná ña ná a cáxi tuhun na nuú ñayivi ña naçini na

anda quiahva ná xinu quivi nditacu tucu mé a nachindahá Ndióxi nduu ñayivi. ¹⁰ Sahá ña cán quéa nachijehé tuhun na sahá joo nandituhún xihin táhan na ndía cuni cachi Jesús tá ñacachi a ña nditacu tucu a. ¹¹ Anda já ñacasáhá ndáca tuhún na mé á já cáhí na já xihin á:

—Ndávaaha cáhí na jánaha ley Moisés ña ndítahan quixi jihna ñúhú profeta Elías —ñacachi na.

¹² Já ñacachi Jesús já xihin ná:

—Mé a ndaa jihna ñúhú quixi Elías ta ndaja vaha ndihi da ñaha. Á co xini ndó ndá quiahva cáhí tuhun Ndióxi sahá da chindahá Ndióxi nduu ñayivi. Cáhí a ña ndoho ini da ta candají na da. ¹³ Joo cáxi tuhun i nu ndó ña sa ñaquixi va Elías ta ñacaja na tá quiahva cuni mé va na xihin dá ta tá quiahva cáhí tuhun Ndióxi ndoho da quiahva já ndandoho da —ñacachi Jesús.

Tá nandaja vaha Jesús in taa loho ndácaan ínima quini ini (Mt. 17:14-21; Lc. 9:37-43)

¹⁴ Tá nandihí já nandicó coo Jesús xihin na cán nu ndúu java ga na xica tuun xihin á cán. Já ñaxini na cuahá ndivaha ñayivi ñacava nuu na na cán. Jári ñúhu java na jánaha ley Moisés cáni táhan yuhu ná xihin na xica tuun xihin Jesús. ¹⁵ Tá ñaxini ñayivi yóho Jesús chí ñacatóntó ndihi na já nandava nihni na ñasahan na cáhan Ndióxi ná xihin á. ¹⁶ Anda já nandaca tuhún Jesús na já cáhí a já xihin ná:

—Ndá saha ndítuhún ndó xihin na jan —ñacachi a.

¹⁷ In da cándichi cán nanducú ñehe da tuhun nu Jesús já cáhí da já:

—Maestro, yóho ñehe e jahyí i ñacasaá i nu ndó jáchi ndácaan in ínima quini ini da ta nandaja níhi ñahá ri.

¹⁸ Ndá ñacuu tíin rí da, jándacava rí da nu ñúhu ta já cásáhá cána cuyu chiquiñu yuhu dá ta cáhñá nuhu dá.

Xihín ña yóho cásahá jácuitá rí da. Ta sa ñaxica i ñamaní nuú ña xica tuun xihín ndó ña ná tavá ña mé ínima quini yóho joo coó ñacuu caja na ña —ñacachi da.

¹⁹ Já ñacachi Jesús já xihín ná:

—Ndáhví ñahá ñacuu ndó jáchi sa cuahá ndivaha quivi iin i xihín ndo ta a ñaha candeé ini ndó yehe. Ta chí co ndeé ga ini i xihín ña cája ndó. Taxi ndó da loho jan chóho —ñacachi a.

²⁰ Chí ñéhe na da loho cán ñasaa ña nu Jesús. Ta tá ñaxini mé rí quini ndácaan ini da loho Jesús ivi laá ñacaja rí ña ná quivi yihí da loho cán já tíví núu da ñandicava da nu ñúhu xihín chíquiñu cána yúhu dá. ²¹ Anda já ñandaca tuhún Jesús tátá da cán já cáchi a já xihín dá:

—Á sanahá ndóho jahyún ña yóho —ñacachi a.

Já ñacachi tátá da cán já:

—Janda tá loho da cája rí já xihín dá. ²² Ta cuahá tañu chícaan rí quini da ini yávi núhu xihín ini ticuí viti ña cahní ñahá rí cúní rí. Ña cán quea xica tahví i nu ndó ña ná candáhví loho ini ndó ndehe ta chindeé ndó ndehe tá ta cuu caja ndó ña —ñacachi da.

²³ Anda já cáchi Jesús já xihín dá:

—Cuu caja i ña tá cándúsún yehe. Jáchi cuu caja i tóco ndihi ñaha xihín ñayivi tá candeé ini na yehe —ñacachi a.

²⁴ Ivi laá ñacayuhú tátá mé da loho cán já cáchi da já:

—Cándúsa vi joo chindeé ndó yehe ná candúsa chága i —ñacachi da.

²⁵ Ta tá ñaxini Jesús ña ñacasahá chútú cuahá ñayivi já ñandicuehe mé á xihín mé rí quini cán já cáchi a já xihín rí:

—Ínima quini, rí ñandaja níhi ta ñandaja jóho da loho yóho, sáhná i chuun nuun ña ná queún cuhun ta a ndícó coo gaún ndihvún ini da —ñacachi a.

²⁶ Andá já n̄acayuhú cóhó rí quini cán já n̄asahní yíhí tucu rí da. Chí n̄aqueta rí cuah̄an rí ta najándacoo rí da loho cán tátuhun in nd̄ii sahá ña cán queá n̄acasáhá cáchí ñayivi ña s̄a naxih̄i va da jan. ²⁷ Joo n̄atiin Jesús ndáha dá já n̄andiñehe a da. Ta já n̄andaca ndichi da cán.

²⁸ Ta tá n̄andihvi Jesús ini in vehe xih̄in n̄a xíca tuun xih̄in á já n̄andaca tuhún jehé n̄a mé á já cáchí n̄a já xih̄in á:

—Ndávaha coó n̄acuu caja ndehe tavá nde ínima quini nasandacaan ini da loho jan —n̄acachi na.

²⁹ Já n̄acachi Jesús já xih̄in ná:

—Tá cún̄i ndó tavá ndo tá ínima quini táhan rí yóho ndítahan cajuhun ndó ta cac̄a tahví ndo n̄u Ndióxi —n̄acachi a.

Cáxi tuhun tucu Jesús ndaja coo nuú quivi a

(Mt. 17:22-23; Lc. 9:43-45)

³⁰ Tá n̄aquee na cuah̄an n̄a nayaha na chí estado Galilea ta co cún̄i Jesús ña ná candaa ini ñayivi ³¹ jách̄i jánaha Jesús nuú n̄a xíca tuun xih̄in á cún̄i a. Ta cáchí a xih̄in ná ña vaxi quiv̄i ndiquiahva ñayivi mé á, da n̄achindahá Ndióxi nduu ñayivi ndahá ñayivi ta cahní ñahá n̄a joo tá ná yaha un̄i quiv̄i nditacu tucu a. ³² Joo coó n̄acandaa ini na ña cáhan xih̄in ná ta yíhv̄i n̄a ndaca tuhún n̄a mé á sahá tuhun cáhan.

Ndicani Jesús ndá n̄a cúu n̄a ín chága saha

(Mt. 18:1-5; Lc. 9:46-48)

³³ Ta ndaja coo n̄axinu n̄a ñuu Capernaum ta tá s̄a ndúu na vehe já n̄acasáhá ndáca tuhún Jesús n̄a xíca tuun xih̄in á já cáchí a já xih̄in ná:

—Ndía ndítuhún ndó saha tá vaxi ndó ích̄i —n̄acachi a.

³⁴ Joo coó n̄anducú ñehe n̄a cán tuhun n̄u á jách̄i ích̄i nuú n̄aquixi na n̄andítuhún cuaha ná saha ndá da cúu da cáhnu chága tañu mé ná. ³⁵ Andá já nasacoo Jesús já

naçana ndíhuxu ivi da xíca tuun xihin á já naçasáhá cáchí a já xihin dá:

—Ndá ndó, na cúní cacuu na nu cuítí ndítahan ndaja núu ndó mé ndó cacuu ndó na nu ndíhí ta caja ndíví ndo nu ndíhi na —naçachi a.

³⁶ Tá nandihí já naçana Jesús in da loho já nasacu a da mahnú nu ndúu na já nasañehe ndaa da já naçasáhá cáchí a já:

³⁷ —Ndá na ná ndiquehe vaha in da loho tátuhun da yóho sahá ña quíhvi ini na yehe, ndíquehe ri na yehe viti. Ta ndá na ndíquehe yehe, a juú in túhún yehe ndíquehe na vaha jáchí ndíquehe ri na tátá i, mé a nachindahá yehe —naçachi a.

Tá ndúu java na ndíquehe saha yo já quea cuahan na xoo í (Mt. 10:42; Lc. 9:49-50)

³⁸ Anda já naçachi Juan já:

—Maestro, naçini nde in dataa ta cahan da quivi mé ndó já tává da ínima quini núhu ini ñayivi. Joo co xíca nuu da xihín yo sahá ña cán quea nasaji nuu nde nu dá caja da ña —naçachi da.

³⁹ Joo naçachi Jesús já:

—A cájí nuu ndó nu dá jáchí tá cája in na ña xitúhún xihín quiví i já quea a cuú caca nuu na cahan núu na sahá i. ⁴⁰ Jáchí ndá na co ndíndita caja xíxi xoho, mé na cán cuahan na xoo mí. ⁴¹ Ta ndá na ná quiahva in ñaha nu ndó vatí in yáxi ticuí sahá ña ndíco ndó yehe mé a ndaa ná cahan i xihín ndo ña चाहvi tá चाहvi Ndióxi sahá ñamani cája na xihín ndó —naçachi Jesús.

Tá jándacava ñayivi inga na nuú cuachi (Mt. 18:6-9; Lc. 17:1-2)

⁴² Ta cáchí tucu Jesús já:

—Ndá nā ná jándacava in nā ndahví, nā cándéé ini yehe nuú cuachi janda vaha chága ná candico in yuú yojó jico ná ta ná ndihi sahá nā चाहá tañuhú. ⁴³ Tá ndáha ndo queá jándacava ndohó nuú cuachi chitúhun ndó a jáchi vaha chága ná cūhun ndó indivi xihín in túhún ndáha ndo a juú ga cūhun ndó xihín ndívi ndáha ndo indayá nuú co ndáhva ñúhu cáyi. ⁴⁴ Ta cán ni ticujú co xihí ni ñúhu cáyi co ndáhva. ⁴⁵ Tá saha ndo queá jándacava ndohó nuú cuachi chitúhun ri ndó ña jan va jáchi vaha chága ná cūhun réncō ndó indivi xihín in túhún saha ndo a juú ga cūhun ndó xihín ndívi saha ndo indayá nuú co ndáhva ñúhu cáyi. ⁴⁶ Ta cán ni ticujú co xihí ta ni ñúhu cáyi co ndáhva. ⁴⁷ Tá nduchú núu ndó queá jándacava ndohó nuú cuachi tavá ndó ña jáchi vaha chága ná coo cóhó nuu ndó cūhun ndó nuú cacomí Ndióxi cuéntá saha ndo a juú ga ña ná coo ndívi nduchú núu ndo cūhun ndó indayá. ⁴⁸ Ta cán ni co xihí ticujú ta ni ñúhu cáyi co ndáhva.

⁴⁹ 'Tá quiahva ndívií jiuhún cuáán cája ñúhu cáyi quiahva já ndivií ínimā ñayivi xihín ña ndóho ini na. Ta tóco ndihi ñaha jóco nā nu Ndióxi chícaan nā ñii yívi na já co tívi a. ⁵⁰ Vaha va cája ñii jáchi xihín ñii ndíhaji ña xíxi na joo tá co óhva ña já a cuú caja ohva tucu yó a já ná caja chúun tucú ña. Ndítahan nu ndóhó caja ndó tátuhun cája ñii ta já canduu víi xihín táhan ndó —cáchi Jesús.

10

Jánaḥa Jesús nuú nā sa natandaha ña co ndítahan jándacoo táhan na

(Mt. 19:1-12; Lc. 16:18)

¹ Naquee Jesús ñuu Capernaum cuahan. Já nasahan estado Judea xihín ñundáhyi íin inga xoo yuta Jordán. Cán naçasáhá nanditaca tucu ñayivi nu á chí jánaḥa tucu a nā tá quiahva naçaan mé á cája. ² Anda já naçayati java

na fariseo nu Jesús sahá ña coto ndojó ñahá na cúni na. Nacachi na já xihín á:

—Á núná nuú in dataa jándacoo da ñájíhí da —nacachi na.

³ Já nanducú ñehe Jesús tuhun nu ná já cáchí a já xihín ná:

—Ndaja cáchí ley Moisés ña ndítahan caja ndó —nacachi a.

⁴ Anda já nacachi na cán já:

—Tá ná quiahva in dataa in tutu nu ñájíhí da sahá ña cúni da jándacoo da ña já queá sahan ley Moisés ñamani jándacoo da ña —nacachi na.

⁵ Anda já nacachi Jesús já xihín ná:

—Sahan ley Moisés ñamani yóho nu ndo jáchi táhyí ndivaha ínima ndo. ⁶ Joo janda mé saha tá nacavaha Ndióxi ñayivi nu cuítí já nacavaha in túhún ta xihín in túhún ñáha. ⁷ Saha ña cán queá ndítahan nuú dataa jándacoo da tátá da xihín náná da já ndique táhan da xihín ñájíhí da. ⁸ Já xinu ndíví na cán cacuu na tátuhun in víxí yiquí cuñu na sahá ña cán queá co cúu ga na ivi yiquí cuñu sahá ña nanduu na tátuhun in túhún yiquí cuñu. ⁹ Saha ña cán queá co ndítahan nuú na cán janí táhan na ña najácatáhan Ndióxi tá natandaha ná —nacachi Jesús xihín ná.

¹⁰ Ta tá nandicó coo tucu na vehe já nacasáhá tucu na xíca tuun xihín á cán ndáca tuhún na Jesús sahá ña nacahan. ¹¹ Ta nanducú ñehe Jesús tuhun nu ná já nacachi a já:

—Tá ná jándacoo in dataa ñájíhí da ta tándaha dá xihín inga ñáñáha já queá cája da cuachi nu ñájíhí nuú da jáchi ín da xihín inga ñáha. ¹² Ta tá ná jándacoo in ñáñáha yí ña ta tándaha ña xihín inga da cája ri ña cán va cuachi nu yí ña jáchi ín ña xihín inga dataa —nacachi Jesús.

*Cája yii Jesús na valí**(Mt. 19:13-15; Lc. 18:15-17)*

¹³ Anda já ñéhe na java na valí ñacasaa na nu Jesús ña ná cani ndaa ndáha á na. Joo mé na xíca tuun xihín á cán ñacasáha na cája cuehe na xihín mé na ndáca na valí cán.

¹⁴ Tá ñaxini Jesús ña cája na já ñandicuehe a já cáchí a já xihín na xíca tuun xihín á:

—Quiahva ndó ñamaní ná quixi na valí nuú i ta a cáji nuu ndó nu ná jáchi cacomí Ndióxi cuéntá sahá ñayivi tá ná caja na tá quiahva cája na valí yóho. ¹⁵ Mé a ndaa ná cahan i xihín ndo ndá na co cuni ndiquiahva na mé ná ndáha Ndióxi tátuhun cája na valí yóho já quea a cúu cacomí Ndióxi cuéntá saha ná —ñacachi a.

¹⁶ Anda já ñacasáha Jesús ñéhe ndaa na valí ta chínúu a ndáha á jini ná já cája yii á na.

*Cahan in da cuica xihín Jesús**(Mt. 19:16-30; Lc. 18:18-30)*

¹⁷ Tá cuahan tucu Jesús íchi já xínu in dataa ñacasaa da nasaxítí da nu á já cáchí da já xihín á:

—Maestro, mé ndó cúu ndó taa vaha ña cán quea ndáca tuhún i ndohó ndía ndítahan caja i já ná ñehe táhvi cuhun i indiví coo i anda ama cáa quivi —ñacachi da.

¹⁸ Já ñacachi Jesús já xihín dá:

—Ndá cuéntá quea cáhún xihín i ña cúu u da vaha. Ni in tuhún toho ñayivi co cúu ná na vaha ñuyiví yóho. In tuhún Ndióxi cuití va quea vaha. ¹⁹ Sa xini vún ña sáhdá Ndióxi nuun cajún já cáchí a já: “Coto a cóun xihín ñájíhí á yí ñani táhún. Coto a cáhnún ndi. Coto a cája cuhnún. Coto a cáhún ña tuhún sahá ñayivi. Coto a jándahvún ñayivi. Ta caja cáhnún tátún xihín nánún” —ñacachi Jesús xihín dá.

²⁰ Já ñacachi da cán já:

—Maestro, janda tá nasacuu u taja loho nasasáhá i caja i tóco ndihi ña sáhndá Ndióxi caja i —nacachi da.

²¹ Nasandehé Jesús nu dá ta táhnda ini a saha dá ja nacachi a ja xihin dá:

—Inga ñaha cámanj cajún: Cuáhán jicún tóco ndihi ñahún jan ta ndacahndún jjuhún jan nuú na ndahví ja ñehé táhvun coo cuahá ñahún indiví. Ta tá nandihí ja quisún candicún yehé —nacachi Jesús.

²² Joo tá naxini johó da cuicá cán ña nacachi Jesús ivi láa nacavitá ini da ja naquee cuéha dá cuahan da jáchi ín cuahá ndivaha ñaha da.

²³ Anda ja nasasáhá sándeheé Jesús nuú na xica tuun xihin a cán ja nacachi a ja:

—Ndaja yáncá ndivaha caa ja ndiquiahva na cuicá mé ná ndáha Ndióxi ña ná cacomí a cuénta saha ná —nacachi a.

²⁴ Chí nacatontó mé na xica tuun xihin á cán sahá tuhun nacañan joo nandicañan tucu Jesús ja cáchi a ja:

—Jahyí a, ndaja yáncá caa sahá in na cándéé ini jjuhún ndiquiahva na mé ná ndáha Ndióxi ña ná cacomí a cuénta saha ná. ²⁵ Jáchi janda cama chága cuu yaha in camello ini in yávi saha yítucú a juú ga ña ná ndiquiahva in da cuicá mé dá ndáha Ndióxi ña ná cacomí a cuénta saha dá —nacachi Jesús.

²⁶ Anda ja nacatontó ndihi mé na xica tuun xihin á cán tá naxini johó na ña yóho. Já nasasáhá ndáca tuhún táhan na ja cáchi na ja:

—Ndá na cúu na cuu cacu ndaa ínima, dá ja —nacachi na.

²⁷ Nandicoto nihni Jesús nu ná ja cáchi a ja xihin ná:

—Ni in na a cúu caja ña yóho joo Ndióxi quea cuu caja ña jáchi ni in ñaha co íhvi toho nu Ndióxi —nacachi a.

²⁸ Anda ja nacachi Pedro ja xihin Jesús:

—Joo ndehe najándacoo ndihi nde ña nasacomí nde ta ndíco nde ndohó —nacachi da.

²⁹ Já nanducú ñehe Jesús tūhun nu ná já cáchi a já:

—Mé a ndaa ná cahan i xihin ndo ña ndá na jándacoo vehe na á ñani na á quiahva na á tátá na á náná na á ñájíhí na á jahyi na á ñundáhyi ná sahá yehe xihín sahá tūhun cáhan i, ³⁰ na cán cúú na ñehe cuaha chága ví ñaha ñuyíví yóho jatá ña najándacoo na tátūhun vehe na, ñani na, quiahva na, náná na, jahyi na, ñundáhyi ná viti vatí ná ndicuita ñayivi caja xíxi na xihin ná. Joo ñehe táhvi ná catacu na anda ama cáa quivi xihin Ndióxi. ³¹ Ta ndúu cuahá na ñin sahá ñuyíví yóho viti joo vaxi quivi cacuu na na coó saha nu Ndióxi. Ta ndúu cuahá na coó saha ñuyíví yóho viti joo vaxi quivi cacuu na na ñin saha nu Ndióxi —nacachi a.

*Cáxi tūhun tucu Jesús ña quivi a
(Mt. 20:17-19; Lc. 18:31-34)*

³² Ta ndaja coo cuahan Jesús xihín na xíca tuun xihín á chí íchi ndáa cuahan chí Jerusalén. Cánū Jesús cuahan xihín ná. Ta nacatóntó na cán ta yíhvi na cuahan na xihín á. Anda já natavá xóo tucu a ndíhuxu ivi na xíca tuun xihín á já nacasáhá cahan xihín ná ña ndoho a chága chí nuu. ³³ Já nacachi a já:

—Candehé ndo. Yóho ndáa í cuahan yo chí Jerusalén nuú ndiquiahva na yehe, da nachindahá Ndióxi nduu ñayivi ndahá na sacuahá nuú jutu xihín nuú na jánaha ley Moisés. Na yóho cúú na cacu ini sahá ndaja quivi i. Anda já ndiquiahva na yehe ndahá na tóho. ³⁴ Cuacu ndaa na yehe ta cani na yehe ta cuihna na tójíi na nuú i ta já cahní na yehe. Joo tá ná yaha uni quivi nditacu tucu u —nacachi Jesús xihín ná.

*Tá naxica Jacobo xihin Juan ñamani nu Jesús
(Mt. 20:20-28)*

³⁵ Anda já nacayati Jacobo xihin Juan, jahyi Zebedeo nu Jesús já nacachi da já xihin á:

—Maestro, cuni nde caca nde in ñamani nu ndo — nacachi da.

³⁶ Já nacachi Jesús já xihin dá:

—Ndía mani cuni ndó caja i xihin ndo —nacachi a.

³⁷ Já nacachi da cán já xihin á:

—Ña xica nde nu ndo quéa ná quiahva ndó ñamani nuú nde cacoo in in nde xoo jíin ndo. In nde coo xoo cuáha ta in nde coo xoo íti jíin mé ndó indivi nuú coo ndó cacomí ndó cuénta sahá ñayivi —nacachi da.

³⁸ Anda já nacachi Jesús já xihin dá:

—Co cándaá ini ndó ña xica ndó nuú i. Á cuu ndoho ini ndó tá quiahva nditahan nuú i ndoho ini i. Jáchi ña vaxi nuú i ndoho ini i cúu á tátuhun coho i in yáxi ndutá ova. Á íin tiahva ndó ndoho ini ndó tá quiahva nditahan nuú i ndoho ini i anda quiahva ná quivi i —nacachi a.

³⁹ Já nacachi da cán já:

—Cuu caja nde ña.

Já nacachi Jesús já xihin dá:

—Mé a ndaa tandaa quivi coho ndó ña ova ñúhu ini yáxi, mé ña coho i. Ta tandaa quivi ndoho ndivaha ini ndó tá quiahva ndoho ini i anda quiahva ná quivi i. ⁴⁰ Joo sahá ña cacoo in ndó xoo cuáha i ta in ndó xoo íti i a juú nuú i quiahva i ña nu ndo. Jáchi sa nandicaxi Ndióxi na ñehe táhvi cacoo cán —nacachi Jesús xihin dá.

⁴¹ Tá naxini johu uxu chága na xica tuun xihin Jesús cán ña yóho já nacasáha xójo ini na xihin Jacobo xihin Juan viti. ⁴² Joo nacana Jesús na já nacachi a já xihin ná:

—Sa xini ndó ndaja cája na sáhdá chuun nuú ñayivi ndúu ñuyivi yóho. Ña cája na quéa jácandíhi na ñayivi ta

cája na tá quiahva cúní mé ná. ⁴³ Joo cō ndítahan coo ña cán tañu mé ndó jáchí ndá da cúní cacuu da cáhnu chága tañu ndó xíní ñúhú cacuu da in da cája ndíví nuú ndihi ndó. ⁴⁴ Ta ndá da cúní cacuu ña nu cuítí tañu ndóhó ndítahan cacuu da da cája ndíví nu ndihi ndó. ⁴⁵ Jáchí ni yehe, da ñachindahá Ndióxi nduu ñayivi cōo ñaquixi i ñuyíví yóho ña ná cajú ndíví ñayivi nuú i. Ña ñaquixi i cajú i queá cajú ndíví i nu ná ta ndiquiahva i mí i quivi i já ná cuu cacu ndaa ínima cuahá ñayivi ná a cūhun ña indayá —ñacachi a.

Tá ñandaja vaha Jesús in da cuáá naní Bartimeo

(Mt. 20:29-34; Lc. 18:35-43)

⁴⁶ Anda já ñaxinu ña ñuu Jericó. Ta tá sa ñaqueta tucu Jesús cuahan jatá ñuu cán xihín ña xíca tuun xihín á xihín cuahá ga ñayivi ta mé yuhú íchí cán ín coo in da cuáá naní Bartimeo, jahyi Timeo sáti da. ⁴⁷ Ta tá ñaxini johó da ña cáyati Jesús, da ñuu Nazaret vaxi da já ñacasáhá mé da cuáá cán cáyuhú cóhó da já cáchí da já:

—Jesús, da ñaquixi chichi David cajú ndó ñamaní candáhví loho ini ndó yehe —ñacachi da.

⁴⁸ Joo ñacasáhá cuahá ñayivi cajú cuehe ña xihín dá ña ná cajú da yúhu dá. Joo ví ga ví cáyuhú da já cáchí da já:

—Ndóhó, da ñaquixi chichi David cajú ndó ñamaní candáhví loho ini ndó yehe —ñacachi da.

⁴⁹ Anda já ñandaca ndichi Jesús já ñacachi a já:

—Cana ndó da ná quixi da.

Já ñacana na da cuáá cán já cáchí ña já xihín dá:

—A ndícani ínún. Candichi jáchí cána Jesús yohó —ñacachi na.

⁵⁰ Anda já najácana da cotó ndeé da ta ñandaca ndichi da já ñasaa da nu ín Jesús. ⁵¹ Anda já ñandaca tuhún Jesús da já cáchí a já xihín dá:

—Ndía cúnun ná cajú i xuhun.

Já nacachi mé da cuaá cán ja:

—Candehé e cúni, xitoho.

⁵² Já nacachi Jesús ja xihin da:

—Cuu nuh vún viti. Sa nandivahún jáchi nacandee inún yehe —nacachi a.

Chí ivi laá nandaca ndehé da cuaá cán. Ja nandico da Jesús íchi cán cuahan da.

11

Ndihvi Jesús ñuu Jerusalén

(Mt. 21:1-11; Lc. 19:28-40; Jn. 12:12-19)

¹ Tá naxinu na yati ñuu Jerusalén jín ñuu Betfagé xihín ñuu Betania ña ndíque táhan nuu xihín yucu yitó Olivo ja nasahnda Jesús chuun nuú ivi da xíca tuun xihín á. ² Ja cáchi a ja xihín da:

—Cuáhán ndo ñuu loho ndácaan yati jan. Tá ná xinu coo ndó jan ndiñehe ndó in búrro ndíco ndaa, rí cámani yii ndaa na. Ndaxí ndó ri ta cañehe ndó ri quixi ndó. ³ Ta nda na ná ndaça tuhún ndohó saha ri ja quea cachi ndó xihín ná ña xíni ñuhú xitoho ndó ri viti joo tá ná ndihi chuun rí ja ndixi tucu rí, ja cachi ndó xihín ná —nacachi Jesús xihín da.

⁴ Ta naquee da cán cuahan da ja nandiñehe da mé búrro cán ndíco ndaa rí jín yéhé yuhú íchi ja nandaxí da ri.

⁵ Ta nda coo java na ndúu cán nacasáhá cáchi na ja:

—Ndía cája ndó. Ndávaha ndaxí ndo búrro jana nde jan —nacachi na.

⁶ Anda ja nanducú ñehe mé da xíca tuun xihín Jesús cán tuhun nu ná ta nacachi da tá quiahva nacachi Jesús xihín da. Anda ja nañehe da ñamani cañehe da rí cuhun da.

⁷ Tá nandihi ja ñehe da búrro cán nacasaa da nu Jesús ja nachojó da cotó ndéé da jata ri ja nandaa Jesús jata ri. ⁸ Ta cuahá ñayivi nacasáhá na chínduu na cotó ndéé na íchi

ta java na načasáhá nā sáhndá nā ndáha yító já chinduu na do íchi. ⁹ Ta nā cuahān chí nuu ta jári nā vaxi chí jata načasáhá nā cáyuhú nā já cáchi nā já:

—Cája cáhnu í Ndióxi. Ndicáhnu nahá ná cacuu da cómi cuéntá saha yo jáchi cúú dá da vaxi yuhú nuu Ndióxi. ¹⁰ Cáhnu ná coo quiví tá casáhá Ndióxi cacomí a cuéntá saha yo. Tá quiahva nasacomí David, tátá yo cuéntá sahá ñayivi sanahá quiahva já cacomí mé á cuéntá saha yo. Cáhnu ná cacuu Ndióxi —cáchi ñayivi.

¹¹ Anda já nandihvi Jesús ñuu Jerusalén ta já naxinu a veñuhu cáhnu cán. Ta tá nandihvi nasandehé ndihí a níi xoo cán já naquee a cuahān chí ñuu Betania xihin ndihuxu ivi nā xíca tuun xihin á jáchi sa nahini ta cuahān cuáá va.

Tá nachicaan Jesús cháhan jata titó ñuhú

(Mt. 21:18-19)

¹² Tá naquee na Betania inga quivi itaan já načasáhá cuico Jesús cuahān. ¹³ Tá naxini xíca a in titó ñuhú vaha dó ndoco ndáha. Nasahān Jesús sándehe á a ín cuihi nu do joo co rí ná ñehe a. Ndáha uun va dó cán ín jáchi a juú tiempo coo rí cán queá. ¹⁴ Anda já nacaahān Jesús xihin titó ñuhú cán já cáchi a já xihin do:

—Ni in ga nā a cáxi ga cuihi nu yóhó —cáchi a xihin do. Ta naxini johō nā xíca tuun xihin á cán tuhun yóho.

Tá nataxí Jesús nā ndúu jícó ñaha yéhe veñuhu

(Mt. 21:12-17; Lc. 19:45-48; Jn. 2:13-22)

¹⁵ Tá nandihvi já naxinu nā Jerusalén. Ta tá nandihvi Jesús veñuhu cáhnu cán já načasáhá táxi a nā ndúu jícó cán xihin nā ndúu xéen viti. Ta naxicó ñehe a mesa nā ndúu ndijama jiuhún ñayivi ta naxicó ñehe a táyi sácoo nā ndúu jícó ndijata. ¹⁶ Ta chí coo nasahān ñamaní nuú ñayivi cañehe na ñaha ndihvi na veñuhu. ¹⁷ Anda já načasáhá jánaħa nu ná já cáchi a já xihin ná:

—Já cáhí t_uh_un Ndióxi: “Vehe mí i cacuu a vehe nuú quixi na ca_ca t_ah_ví n_a nuú i sa_ha tó_có ndihi ñayivi ñuyívi”, cáhí t_uh_un Ndióxi. Joo ndóhó nandai cuu ndó yóho caja cuíh_ná ndo nuú ñayivi —nacachi Jesús xih_in ná.

¹⁸ Tá mé n_a sa_cu_ah_a nuú jut_u cán xih_in n_a jána_ha ley Moisés naxini joh_o na ñ_a yóho já nacasáhá n_a ndú_cú n_a ndá quia_hva cahní n_a a jách_i yíh_ví ñahá n_a sa_ha ñ_a cá_tóntó ndihi ñayivi xih_in ñ_a jána_ha mé á n_u ná. ¹⁹ Joo tá nacuaá já naquee Jesús ñuu cu_ah_an xih_in n_a xíca tuun xih_in á.

Tá nahichi titó ñuhú, dó cóo cuíhi nuu
(Mt. 21:20-22)

²⁰ Ta naha chá inga quiví ita_an nayaha na n_u cándichi mé titó ñuhú cán já naxini na ñ_a nahichi do jand_a yóho do nahichi. ²¹ Anda já nandicuhun ini Pedro sa_ha mé titó ñuhú já cáhí da já xih_in Jesús:

—Maestro, candehé ndó titó ñuhú, dó nacahan cuehe ndó xih_in. Sa nahichi dó viti —nacachi da.

²² Já nacachi Jesús já xih_in dá:

—Candee ini ndó Ndióxi. ²³ Jách_i mé a ndaa ná ca_ha_n i xih_in ndo ñ_a tá ná cachi ndó xih_in yúcu yóho: “Caxoo ta cuáhán jáquetún mún ini tañuhú”, ta tá có cáhvi ivi joh_o ini ndó ta tá candúsa ndó coo tá íin cáhí ndó ta chí já ndusa coo. ²⁴ Sa_ha ñ_a cán quéa cáhí i xih_in ndo ñ_a tó_có ndihi ñ_aha xíca t_ah_ví ndó n_u Ndióxi ta tá cándúsa ndó ñ_a sa nañehe ndó a já quéa ñehe ndusa ndó a. ²⁵ Ta tá ndúu ndó xíca t_ah_ví ndo n_u Ndióxi xíní ñuhú caja cáhnu ini ndó sa_ha ndá n_a xójo ini ndó xih_in já ná caja cáhnu ri ini Ndióxi, tátá ndo ñ_a íin indiví sa_ha cu_achi ndó. ²⁶ Joo tá có cája cáhnu ini ndó sa_ha ñayivi já quéa ni Ndióxi, tátá ndo ñ_a íin indiví a cája cáhnu ini a sa_ha cu_achi ndó —nacachi a.

Tá nandaca tuhún na Jesús ña ndáchí quíxi ndée á ña caja cuhá nuú ñaha

(Mt. 21:23-27; Lc. 20:1-8)

²⁷ Anda já nandicó coo tucu na ñuu Jerusalén. Ta tá xíca Jesús chí veñuhu cáhnu cán já nacayati na sacuahá nuú jutú xihín na jánahá ley Moisés xihín na sacuahá veñuhu nu á. ²⁸ Já nandaca tuhún na Jesús já cáchí na já xihín á:

—Yo já sáhan ñamani nuun cajún ña cajún yóho —nacachi na.

²⁹ Já nacachi Jesús já xihín ná:

—Ná ndaca tuhún ri yehe va ndohó ta tá ná nducú ñehe ndó tuhun nuú i anda já caxi tuhun i nu ndo yo já nasahan ñamani nuú i caja i ña caja i yóho. ³⁰ Cachi ndó xihín i yo já nachindahá Juan ña ná quíxi da caja ndúta da ñayivi. Á Ndióxi nachindahá da, á ñayivi nachindahá ñahá. Nducú ñehe quí ndó tuhun nuú i viti —nacachi Jesús xihín ná.

³¹ Anda já nacasáhá ndítuhún xihín táhan na cán já cáchí na já:

—Tá ná cachí ña Ndióxi queá nachindahá Juan ta já nducú nehe Jesús tuhun nu yo já cachi da xoho: “Ndá cuénta queá coo naxeen ndó candúsa ndó da, dá já”, cachi Jesús xoho. ³² Ta tá ná cachí: “Ñayivi cúu na nachindahá Juan”, já ndicuíta ñayivi xihín yo —nacachi na ndítuhún xihín táhan na.

Já cachí na jáchi yíhvi na ñayivi jáchi tóco ndihi ñayivi nacahán na saha Juan ña cúu dá da nachindahá Ndióxi jáyaha da tuhun cáhan mé á nuú ñayivi. ³³ Sahá ña cán queá nacachi na já xihín Jesús:

—Coo xíni toho nde yo nachindahá Juan.

Anda já nacachi a já xihín ná:

—Ta ni yehe a caxi tuhun i nu ndo yo já nasahan ndée nuú i caja i ña yóho —nacachi a.

12

Sácú Jesús quiahva sahá java mozo, da nacaja quini xihín xitoho

(Mt. 21:33-46; Lc. 20:9-19)

¹ Anda já nacasáhá Jesús sácú a quiahva nuú ñayivi já nacachi a já xihín ná:

—Nasahiin in dataa najándeé cuaha dá tó uva nu núhu dá ta já nasacu da in corra yító nu do. Ta nacavaaha da in nuú cuhni mé uva cán ña cavaaha vino. Ta nacavaaha da in nu jícó canúu da já cuu candaa da tóco ndihi dó cán.

Tá nandihí já nasahan ndojó da núhu dá nuú java na caja chúun na ña já naquee da cuahan xicá da. ² Ta tá naxinu tiempo jáquee na já nachindahá da in mozo da nuú na cája chúun núhu da cán ña ná ndiquiahva na ña cáni nu dá ndiquehe da saha núhu da ña nasahan ndojó da nuú na cán. ³ Joo mé na cája chúun tóo núhu cán natiin na mozo da cán já nacani na da. Tá nandihí já nanducú ñehe na da nuú xitoho da joo coo ñaha ná sahan na nu dá. ⁴ Anda já nachindahá tucu mé da xihín ñaha núhu cán inga mozo. Joo da yóho nacaja xixi tucu na xihín dá jáchi nacani na da xihín yuu. Ta najándicuehe na jini dá já nacasáhá canahá na xihín dá. ⁵ Ta mé da xihín ñaha núhu cán nachindahá tucu da inga mozo da ta nasahní na da. Ta nachindahá cuhá ga da mozo da nasahan cán. Ta java da nacani na ta java da nasahní na.

⁶ Nacandoo in túhún jahyi mé da xihín ñaha núhu cán ta quihvi ndivaha ini da jahyi da. Joo tá nu ndihí já nachindahá da jahyi da jáchi cahan da: “Cája i cuénta coo toní núhú na xihín jahyí i”, nacahan da. ⁷ Joo mé na cája chúun núhu cán nacasáhá ndítúhún xihín táhan na já cáhí na já: “Candehé ndo. Yóho vaxi da cúu jahyi xitoho í. Ta tá ná xinu quiví quivi xitoho í ta da yóho cacuu da ndicojo chuun saha núhu yóho. Cóho cahní yó da já ná

candoo ñúhu yóho ndáha mí”, ñacachi xihín táhan na cán.
 8 Anda já ñatiin na da cán ta ñasahní na da já ñajácana na yiquí cuñu da jata cútú cán —ñacachi Jesús.

9 Anda já ñandaca tühún Jesús ñayivi ndúu cán já cáchí a já:

—Á cō xíní ndó ndíá caja da xihín ñaha ñúhu yóho viti. Ña caja da queá quixi da ta cahní ndihi da na cája chúun tóo nu ñúhu dá. Já ndiquiahva da ñúhu dá nuú java ga na já ná caja chúun na nu á.

10’Á cō xíní ndó ña cáchí tühun Ndióxi. Ña cáchí a queá: Mé yuu ña ñajácana da cávaha vehe, ña cán cúu ña ñanduu yuu ndúhu sahá vehe ña íin chága saha.

11 Ña yóho queá ñacaja Ndióxi ta cúu á in ñaha cáhnu ndivaha nu yō, cáchí tühun Ndióxi —ñacachi Jesús.

12 Anda já ñacasáhá ndúcú na sacuahá tiin na Jesús chicaoan na a vecaa jáchi ñacandaa ini na ña saha mé ná ñasacu a quiahva yóho. Joo sahá ña yíhvi na ñayivi ñajándacoo na a ta ñaquee na cuahan na.

Ndáca tühún na Jesús á ndítahan nu ná chahvi na jiuhún cuéntá impuesto

(Mt. 22:15-22; Lc. 20:20-26)

13 Tá ñandihí já ñachindahá na java na fariseo xihín na cúu cuéntá Herodes nu Jesús ña ná coto ndojó ñahá na xihín tühun cáhan mé á já ná chicaoan na cuachi jata.

14 Anda já ñaxinu na nu Jesús já cáchí na já xihín á:

—Maestro, xíní nde ña ndinuhu ña ndaa cáhan mé ndó. Ta cō quehe ndó cuéntá tá cáhan núu ñayivi saha ndo. Ta cándaa ini nde ña tá cáhan ndó sahá in ñaha cája ñayivi cúu á sahá ña sándehe ndó janda ínima ná. Ta cándaa ini nde ña jánaaha ndó ña ndaa saha íchi cuéntá Ndióxi. Ta viti cúni nde ndaca tühún nde ndohó á ndítahan nuú nde

chahvi nde jjuhún cuéntá impuesto nuú da cómi cuéntá saha yo ñuu Roma. Á chahvi nde ña, á a chahvi toho nde ña —nacachi na.

¹⁵ Joo sa nacandaa ini Jesús ña co cúu ná tá quiahva ndaa na ña cán quea nacachi a já xihin ná:

—Cándaá cáxi táhyí ini i ña cúní ndó coto ndojó cuití ndó yehe. Jánaha ndó in táhan jjuhún jan nuú i ná candehé e ña —nacachi a.

¹⁶ Já nasahan na mé jjuhún cán nu á ta tá naxini a ña já nacachi a já xihin ná:

—Yo nahná ta yo quivi quea ndaa nu á.

Já nacachi na cán já xihin á:

—Ñéhe a quivi xihin nahná da cómi cuéntá saha yó ñuu Roma —nacachi na xihin á.

¹⁷ Anda já nacachi Jesús já xihin ná:

—Ndiquiahva ndó ñaha da cómi cuéntá saha ndó ñuu Roma jan nu dá. Ta ndiquiahva ndó nu Ndióxi ña cúu ñaha mé á —nacachi a.

Chí nacatontó mé na cán sahá ña nacachi Jesús xihin ná.

*Ndáca tuhún na saduceo Jesús á mé a ndaa nditacu ndii
(Mt. 22:23-33; Lc. 20:27-40)*

¹⁸ Anda já nasahan java na saduceo cahan na xihin Jesús. Ta mé na saduceo yóho co cándusa na ña ndítacu tucu na sa naxihi. Saha ña cán quea nandaca tuhún na Jesús já cáchi na já xihin á:

¹⁹ —Maestro, nu ley nacahyi Moisés sanahá natahnda chuun ta cáchi a já: “Tá tándaha in dataa xihin ñájíhí da ta tá coo jahyi ña cacu xihin dá ta tá ná xinu quivi quivi da cán já quea cáchi ley Moisés ña ndítahan tandaha tucu ñájíhí da xihin da cúu ñani mé ndii cán já ná coo jahyi da cán xihin yuhú nuú ñani da”, já cáchi ley Moisés. ²⁰ Ta viti cuni johó ndó ná cacu nde in quiahva nu ndó. Nasahjin

usa ñani ta da nu cuítí ñatandaha dá xihin in ñañaaha. Tá nandihí naxihí da joo coó jahyi da ná cacu xihin ñá cán. ²¹ Ta ñatandaha ñani da, da chí iyi xihin ñá cuáan cán. Ta já naxihí ri da cán va ta ni da yóho coó ñacacu jahyi xihin ñájíhí ñani. Ta quiahva já nandoho ri ñani da, da chí uní. ²² Anda quiahva naxinu ndíhusa da ñatandaha xihin ña ta ni in da coó ñacacu jahyi xihin ña. Tá nu ndíhí naxihí ri mé va ñá. ²³ Ta viti ndáca tuhún nde ndohó ndá da cacuu ndusa yíi ñá cán tá ná xinu quivi nditacu tucu ndii jáchi ndíhusa va ñani da cán ñatandaha xihin ñá —ñacachi na.

²⁴ Anda já nanducú ñehe Jesús tuhun nu ná já cáchi a já xihin ná:

—A váha toho cáhvi ini ndó jáchi co xini ndó ndaja cáhan tuhun Ndióxi ta ni co xini ndó ndá quiahva cáhnu cúu ndée Ndióxi. ²⁵ Jáchi tá ná nditacu tucu ndii a tandaha ga na ta ni a quiahva na jahyi jíhí na tandaha ná. Cacuu na tátuhun táto Ndióxi ndúu indivi ta co tandahá na cán. ²⁶ Joo sa xini yo ña nditacu tucu ndii. Á a ñaha cahvi ndó ña ñacahyí Moisés sahá ña ñacahan Ndióxi xihin dá tañu tohíñú, dó cándaha ñúhu cán. Já ñacachi a já xihin dá: “Yehe cúu Ndióxi cája cáhnu Abraham ta yehe cúu Ndióxi cája cáhnu Isaac ta yehe cúu Ndióxi cája cáhnu Jacob”, ñacachi a. ²⁷ Ta ña yóho cúni cachi a ña tácu yii va Abraham xihín Isaac xihín Jacob vatí sa naxihí yiquí cuñu na. Sahá ña cán quea co xini ndó ndá saha cáhan ndo —ñacachi a.

Tá cáhan Jesús ndíá cúu ña cáhnu chága sáhnda Ndióxi caji

(Mt. 22:34-40)

²⁸ Ta ndaja coo in da jánaaha ley Moisés ñacayati da nu Jesús jáchi sa naxini johó da ña ñacahan Jesús xihín na ndúu cán. Sahá ña xini da ña nanducú ñehe ndaa Jesús

tuhun nuú na cán sahá ña cán quéa nandaca tuhún da Jesús já cáhí da já xihín á:

—Ndía cúú ña cáhnu chága sáhndá Ndióxi caja í — nāchachi da.

²⁹ Já nāchachi Jesús já xihín dá:

—Ña cáhnu chága cúú ña cáhí tuhun Ndióxi yóho: “Taa johó ndó, na Israel. Ín in túhún jini Ndióxi ta mé á cúú xitoho í. ³⁰ Ta ndítahan quihvi ini ndó mé Ndióxi, xitoho ndó xihín tóco ndihi ínimā ndo ta xihín ndinuhu ini ndó. Ta quihvi ini ndó a xihín tóco ndihi xíní túní ndo ta xihín tóco ndihi ndéé ndo.” Ña yóho cúú ña nu cuití sáhndá Ndióxi caja ndó. ³¹ Tá cúní coo ña nu cuití já cúní coo ri ña chí ivi va ta cáhí a: “Quihvi ini ndó ñani táhan ndó tá quiahva quihvi ini ndó mé ndó.” Coó ga inga ña sáhndá Ndióxi caja ndó cacuu ña cáhnu chága nuú ña yóho — nāchachi a.

³² Anda já nāchachi mé da jánaha ley Moisés cán xihín Jesús:

—Vaha chá nāchahan ndó, Maestro. Mé a ndaa quéa nāchahan ndo ña ín in talaá cuití Ndióxi ta coó inga ga Ndióxi. ³³ Ta ndítahan quihvi iní mé á xihín tóco ndihi ínimā yo ta xihín ndinuhu iní ta xihín tóco ndihi xíní túní yo ta xihín tóco ndihi ndéé yo. Ta ndítahan quihvi iní ñani táhan í tá quiahva quihvi iní mí. Ndíyahvi chága ña yóho a juú ga tóco ndihi ñaha jóco na nu Ndióxi ta ndíyahvi chága ña a juú ga ñaha chícaan núhu ná nu náa — nāchachi da.

³⁴ Tá naxini Jesús ña nanducú ñehe vaha da cán tuhun nu á já cáhí a já xihín dá:

—Jalóho cúní ña cacomí Ndióxi cuénta sahun — nāchachi Jesús.

Tá nandihí cán ni in ga na coó nasahan ndeé ini na ndaca tuhún ga na mé á.

Ndáca tuhún na Jesús ndáchí naquixi a

(Mt. 22:41-46; Lc. 20:41-44)

³⁵ Ndácaan Jesús veñuhu cáhnu jánaḥa nuú ñayivi já cáchí a já xihín ná:

—Ndávaha cáchí na jánaḥa ley Moisés ña vaxi Cristo chichi David. ³⁶ Ta sa mé David tá nāchutú ndaa ini da xihín ínima yii Ndióxi já nācachi da já:

Já nācachi Ndióxi xihín xitoho i:

“Cacoo xoo cuáha i yóho,

anda quiahva ná caja i ña ná cacomún cuénta sahá na co cúní yohó”, nācachi Ndióxi sanahá.

³⁷ Ndávaha cáchí na ña vaxi Cristo chichi David joo mé tiempo cán nācachi David ña cúú á xitoho da —nācachi Jesús.

Ta cuaha ndivaha ñayivi cájii íní na táa johu na nu cáhan Jesús.

Chícaan Jesús cuachi jatá na jánaḥa ley Moisés

(Mt. 23:1-36; Lc. 11:37-54; 20:45-47)

³⁸ Tá jánaḥa Jesús na já cáchí a já xihín ná:

—Cuénta coo ndó xihín na jánaḥa ley Moisés jáchi cátóo na cándixi na jáhma nani caca nuu na. Ta cátóo na cáhan toní ñúhú ndivaha ñayivi xihín ná tá xíca nuu na nuú yahvi. ³⁹ Ta tá cuahan na veñuhu cátóo na cacoo na nu sácoo na ín chága saha. Ta tá cuahan na víco nuú vaha cátóo na coo na. Cuénta coo ndó xihín na yóho. ⁴⁰ Jáchi cándaa na vehe najihí cuaan ta tá nāndihi cuahá ndivaha xíca tahví na nu Ndióxi jáchi cúní na jájahvi na nuú ña núu cája na. Mé a ndaa ná cáhan i xihín ndo ña mé na jánaḥa ley Moisés yóho cacuu na na ndoho chága ini caja Ndióxi —cáchí Jesús.

Ña najoco in ña cuaan ndáhvi

(Lc. 21:1-4)

⁴¹ In tañu ñin coo Jesús ini veñuhu cáhnu cán yati nu ñin sato nu táan na jiuhún jóco na nu Ndióxi. Ta sándehe a ndá quiahva táan ñayivi jiuhún ini mé sato cán. Ta naxini a cuahá ña cuicá xinu coo táan cuahá na jiuhún ini mé sato cán. ⁴² Ta mé já naxinu coo in ñá cuáan ndáhví ta nataán ña ivi jiuhún ña núu yahvi ini mé sato cán. ⁴³ Já nacana Jesús na xíca tuun xihín á ta já cáchí a já xihín ná:

—Mé a ndaa ná cahan i xihín ndo ña cuaha chága jiuhún nasahan ñá cuáan ndáhví yóho a juú ga tóco ndihi java ga na cán. ⁴⁴ Jáchi tóco ndihi na cán nasahan na ña yójó nu ná joo ñá cuáan ndáhví yóho nasahan ñá nu Ndióxi tóco ndihi ña cómí ñá catacu ñá —nacachi a xihín ná.

13

Cáxi tuhun Jesús nu ná ña vaxi quivi ndihi sahá veñuhu cáhnu ñuu Jerusalén

(Mt. 24:1-2; Lc. 21:5-6)

¹ Tá naquee Jesús veñuhu cáhnu cán já nacachi in da xíca tuun xihín a cán já:

—Maestro, candehe ndó ndaja náhnu yuu nacavaha na veñuhu yóho ta ndaja jícó ndivaha nacavaha na ña —nacachi da.

² Anda já nacachi Jesús já xihín dá:

—Mé a ndaa náhnu a joo ndá chuun cúú á jáchi ni janda in yuu yóho a cándoq jatá inga yuu jáchi vaxi quivi tá nditaní ndihi ña yóho —nacachi a.

Ndícani Jesús ña coo tá ná cayati quivi ndihi saha ñuyivi

(Mt. 24:3-28; Lc. 21:7-24; 17:22-24)

³ Anda já nasahan na cán yucu yító Olivo, ña xító ndaa táhan xihín veñuhu cáhnu cán. Ta tá ñin coo Jesús cán já naxinu Pedro xihín Jacobo xihín Juan xihín Andrés já nacahan jehé na xihín á já cáchí na já:

⁴ —Cúni nde ña ná caxi tuhun ndó xihín nde ndá ama coo tóco ndihi ña yóho. Ta ndaja coo tá sa ñacayati mé quivi cán —ñacachi na.

⁵ Já ñacachi Jesús já xihín ná:

—Cuéntá coo ndó ta a quiahva ndó ñamani jándahvi ni in ñayivi ndohó. ⁶ Jáchi cuahá ndivaha na quixi na cuéntá mí i ta cahan ña ña tuhún tá cachi na já xihín ndó: “Yehe cúu Cristo, ña ñachindahá Ndióxi cacomí cuéntá sahá ñayivi.” Ta xihín ña yóho cuahá ndivaha ñayivi jándahvi na.

⁷ Joo tá ñacasahá xini johó ndó ña yóho cáa cúu tondohó, a cáyihví toho ndó jáchi quiahva já ndítahan coo. Joo cámani yí xinu coo quivi nu ndíhí. ⁸ Jáchi ñayivi ndúu in nación ndicuita na caní táhan na xihín ña ndúu inga nación ta caní táhan ña in ñuu xihín ña inga ñuu. Ta quixi nditáan ndijáa nu ndúu ñayivi já xinu tamá ndeé ta já casahá ña ndivaa ña. Ta tóco ndihi ña yóho cúu á tá cava sahá sahá ña núu vaxi nuú ñayivi jáchi cámani xinu coo chága nuú ndoho ini na.

⁹ Joo candaa vaha ndó mé ndó jáchi ndiquiahva na ndohó ndahá ña cómí chuun ta caní na ndohó ini veñuhu. Ta sahá yehe cañehe na ndohó nuú ña cómí cuéntá sahá ñayivi xihín nuú ña cúu jutixia ta já cuu cahan ndó sahá i nuú ña cán. ¹⁰ Joo jihna ñúhú xini ñúhú ndicuita nuu tuhun vaha saha mí i nu tóco ndihi ñayivi anda jávi ndihi saha ñuyiví yóho. ¹¹ Ta tá ná cañehe na ndohó cuhun ndó nuú ña jutixia, a ndícani ini ndó sahá ndá tuhun cahan ndó xihín ná. Mé hora já cahan ndó ña quiahva Ndióxi nu ndó cahan ndo. Jáchi a juú jini mé ndó quixi ña cahan ndo. Ínimá yí Ndióxi cacuu ña quiahva tóco ndihi ña cahan ndo. ¹² Ta java ña jicó tuhún ña ñani da ta java da jicó tuhún ña jahyi da ña ná cahní ñahá ña. Ta cuaha ná ndicuita na caní táhan na xihín tátá ña ta cahní ñahá

na. ¹³ Ta ndaja táhan ñayivi ndúu ñuyívi yóho candají na ndohó sahá yehe. Joo ndá na ná candico tuun íchi mí i janda ná xinu quívi quivi na, na jan cacuu na cacu ndaa ínima.

¹⁴ 'Na cáhvi tutu ná candaa ini na ña cáhan. Daniel cúu da nacahyí sanahá sahá in ña quini ña jativí ñahá. Tá ná cuni ndó ña cándichi in a nuú co ndítahan coo a já ndítahan nuú na ndúu estado Judea cunu na cuhun na chí yúcu. ¹⁵ Ta ndá na cánúu jini véhe mé quívi já co ndítahan nuu na tavá na ñaha vehe na. ¹⁶ Ta ndá na ndúu yúcu co ndítahan ndico coo na vehe na ndiquehe na jáhma ná. ¹⁷ Ndáhvi najihí, mé na ñúhu jahyi mé quívi já. Ta ndáhvi na ñéhe ndaa na valí táhan ña chíchi yi. ¹⁸ Caca tahvi ndo nu Ndióxi ña ná a cacuu a tiempo vixi tá ná cunu ndó cuhun ndo já ná a ndóho chága ini ndó. ¹⁹ Jáchí quívi ndoho ndivaha ini ndó cacuu a cán. Jáchí janda tá nacava sáhá saha ñuyívi coo nandoho ini na tá quiahva ndoho ini na mé quívi jan. Ta tá ná yaha ña jan, a ndícó coo ga ña ndoho ini na quiahva já. ²⁰ Ta tá ná a ndája cuítí Ndióxi tiempo yóho ni in ñayivi a cúu cacu ndaa. Joo nasacu ini a ndaja cuítí a mé tiempo yóho jáchí quíhvi ini a tóco ndihi na nacaxi mé á.

²¹ 'Ta tá ná cachi in na xihin ndó: “Candehé ndo, yóho íin Cristo, da nachindahá Ndióxi cacomí cuéntá sahá ñayivi”, á tá ná cachi na: “Candehé ndo, cáa íin da”, cachi na já quéa a cándúsa toho ndó na. ²² Jáchí quixi cuahá na jándahvi ndohó ta ndaja na mé ná tátuhun Cristo. Joo a juú Cristo cúu ná. Ta quixi cuaha ná ta cachi na cahan na cuéntá Ndióxi ta jári caja na cuahá nuú ña náhnu xihín ña xitúhún ña ná jándahvi na ñayivi. Ta anda na sa nacaxi Ndióxi jándahvi na tá ná cuu caja na ña. ²³ Xíní ñúhú candehé vaha ndó mé ndó jáchí sa nacaxi tuhun yachi ndihi i ña yóho xihin ndo —nacachi Jesús.

*Ndaja coo tá ná xinu coo quiví quixi tucu Jesús
(Mt. 24:29-35,42,44; Lc. 21:25-36)*

²⁴ Já cáhí tucu Jesús já:

—Joo tá sa nayaha tóco ndihi ña nandoho ini ñayivi já canaá nuú candii ta a ndíyehē ga yoo. ²⁵ Anda indiví quee quimi cuyu rí nu ñúhu ta quiji nuu indiví ña nacavaha Ndióxi. ²⁶ Anda já cuni na yehē quixi i tañu vico xihin tóco ndihi ndée cáhnu i, da nachindahá Ndióxi nduu ñayivi. Ta cuni na ndá quiahva cáhnu cúu yehē. ²⁷ Ta tá nandihí já chindahá i táto mí i ña ná jánditaca na na sa nacaxi i tañu tóco ndihi ñuu janda ní cúu sahá ñuyíví ta janda ní cúu sahá indiví.

²⁸ Catiahva ndó ña cúní cachi mé quiahva sácú u nu ndó sahá titó ñuhú. Tá yúta ndáha dó cán ta vaxi núma válí do já candaa ini ndó ña vaxi tiempo ihní. ²⁹ Ta quiahva já cacuu ña yóho tá ná cuni ndó yaha tóco ndihi ña yóho. Jáchi anda jáví candaa ini ndó ña nacayati tiempo quixi tucu yehē ñuyíví yóho. ³⁰ Mé a ndaa ná cahan i xihin ndó ña yaha tá yaha tóco ndihi ña nacachi i xihin ndo ta anda jáví quivi na ndúu tiempo viti. ³¹ Ta ndihí sahá indiví xihin ñuyíví joo a ndíhi toho sahá tñhun nacahan i xihin ndó yóho. Jáchi coo tá coo va ña.

³² Joo ni in túhún toho ñayivi co xini na ndá quiví á ndá hora yaha ña yóho. Ta ni mé táto Ndióxi ndúu indiví co xini na ndá quiví coo ña yóho. Ta ni yehē, da cúu in túhún jini já jahyi Ndióxi co xini ndá quiví coo ña yóho. In túhún Ndióxi, tátá yo queá xini a.

³³ Sahá ña cán queá cañuhu ini ndó sahá ña yóho. Coo tiahva ndó ta caca tahví ndo nu Ndióxi jáchi co xini ndó ndá quiví xinu coo ña yóho. ³⁴ Jáchi ña yóho cúu á tátuhun in dataa quéta cuahan xicá joo tá cámaní quee da cñhun da jándacoo tóo da vehe da nu mozo da ña ná candaa na ña. Ta sáhan da chuun caja in in mozo da. Ta nuú da ndáá

yéhé nasahnda da chuun ña ná candaa vaha da ña. ³⁵ Sahá ña cán quea xíní ñúhú coo tiahva ndó jáchi co xíní ndo ndá quíví xinu coo mé da cúú xitoho vehe. Co xíní ndo á cacuu a tá nacuaá tóo á cacuu a java ñuu táji á cacuu a tá nacana chéle á cacuu a tá sa natívi. ³⁶ Cuéntá coo ndó. A juú tiahva náa xinu coo da ta ndiñehe dá ndohó ndúu ndó quíji ndo. ³⁷ Ña cáhan i xihín ndó cáhan i xihín ndihi na: Xíní ñúhú coo tiahva ndó saha mé quíví quixi tucu u —nacachi Jesús.

14

Ndítúhún jehé na tiin na Jesús

(Mt. 26:1-5; Lc. 22:1-2; Jn. 11:45-53)

¹ Tá cámaní ívi quíví caja na víco pascua xihín víco tá xíxi na pan ña co quee yusá naxaa xihín ja nacasáhá na sacuaha nuú jutu xihín na jánaha ley Moisés ndúcu na ndá quiahva caja na tiin jehé na Jesús ja cuu cahní na a. ² Ta ja cáchí xihín táhan na:

—A tiin toho í da mé víco jáchi tiahva náa ndivaa ñayivi —nacachi na.

Tá nahojo in ñáñáha perfume jini Jesús

(Mt. 26:6-13; Jn. 12:1-8)

³ Ta ndaja coo ín Jesús ñuu Betania vehe Simón, da cáhan na xihín: taa nandoho cuehe táhyi. Ta nani ndúu coo na nu mesa cán naxinu in ñáñáha ta ñéhe ña in yúyú alabastro nachutu jíní a xihín perfume, dó támi ndivaha sáhan ta cúú dó perfume yahvi ndivaha. Ta ñatahvi ña yóho mé yúyú cán ja nahojo ña do jini Jesús. ⁴ Ta java na ndúu cán nacasáhá na jaa na xihín ña ja nacasáhá cáchí xihín táhan na ja:

—Ndávaha natívi uun perfume yóho. ⁵ Cuu jicó yó do, nduu ta yáha ga nuú uní ciento denario quehe saha dó ta xihín jiuhún cán cuu chindeé yó na ndahvi, nduu —cáchí na.

Sahá ña cán quéa ñaxojo ini na xihin ñáñáha cán ta ñacahan núu na saha ña.

⁶ Anda já ñacachi Jesús já xihin ná:

—A cahan ndó xihin ña. A jáquihvi ndó ña. Ña vaha quéa ñacaja ñá yóho xihín i. ⁷ Jáchi ña ndahví níí tiempo canduu na tañu ndó ta cuu caja ndó ña vaha xihin ná ndá tañu cúni mé va ndó joo yehé a cóo tuun toho i xihin ndo. ⁸ Mé ñá yóho ñacaja ñá janda nuú ñaxinu ndée ñá caja ñá xihín i. Sa ñajándicuchu yachi va ñá yóho yiquí cuñu i xihín perfume, dó támi sáhan jan ña ná coo tiahva vi tá ná casaa quiví nduxu. ⁹ Mé a ndaa ná cahan i xihin ndo níí cúu ñuyiví nuú caca nuu ñayivi cahan ña tuhun vaha saha mí i já quéa ndicani na ña ñacaja ñá yóho xihín i já ndicuhun ini na saha ña —ñacachi a.

Jíco túhún Judas Jesús

(Mt. 26:14-16; Lc. 22:3-6)

¹⁰ Ta ndaja coo in táhan da uxu ivi xíca tuun xihin Jesús, da naní Judas Iscariote ñasahan da cahan da xihín ña sacuaña nuú jutú. Já ñasahan da tuhun da nuú ña cán ña ndiquiahva da Jesús ndáha ná. ¹¹ Tá ñaxini johó ña cán ña ñacachi da xihin ná ñacavatá ña ta ñasahan ña tuhun na nu mé Judas ña quiahva na jiuhún nu dá. Ta sa mé nani já ñacasáha Judas ndúcú da ndaja cuu caja da ndiquiahva da Jesús nu ná.

Tá ñaxijíni ndayí Jesús xihín ña xíca tuun xihín á

(Mt. 26:17-29; Lc. 22:7-23; Jn. 13:21-30; 1 Co 11:23-26)

¹² Mé quiví nuú víco pascua tá xíxi na pan ña co quée yusá ñaxaa xihin já sáhní ña ndicachi válí jóco ña nu Ndióxi. Já ñandaca tuhún ña xíca tuun xihin Jesús mé á já cáhí ña já xihin á:

—Ndáchí cúni ndó cuhun nde caja ndíví nde cajíni ndó víco pascua —ñacachi na.

¹³ Anda já n̄achindahá Jesús ivi da xíca tuun xih̄in á já cáchí a já xih̄in dá:

—Cuáhán ndó ñuu jan jáchi jan ndiñehe ndó in dataa ñehe da in yoo ticuif ta candico ndó da cuhun ndo. ¹⁴ Tá ná xinu da vehe nuú ndihvi da já cachi ndó xih̄in da cúú xitoho vehe cán já: “Da jánaḥa ndehe cáchí xuhun: Ndáchí ín nuú coo i cajini i vicó pascua xih̄in na xíca tuun xih̄in i.” ¹⁵ Anda já jánaḥa mé da cán in cuarto cáhnu ña cánúu jini véhe piso ninu. Sa ín tiaḥva va ña. Cán caja ndívi ndo ña cajini —n̄acachi Jesús xih̄in ná.

¹⁶ Já naquee mé na xíca tuun xih̄in Jesús cán cuahan na ta tá naxinu na ñuu cán n̄asah̄in tá ín cáchí Jesús xih̄in ná. Já n̄acaja ndívi na ña cajini na vicó pascua mé cán.

¹⁷ Tá n̄acuaá naxinu Jesús xih̄in ndih̄uxu ivi na xíca tuun xih̄in á. ¹⁸ Ta tá ndúu coo na nu mesa xíxi na já n̄acachi Jesús já xih̄in ná:

—Mé a ndaa ná cahan i xih̄in ndo ña in táhan ndó, da ndúu coo xíxi xih̄in i nu mesa yóho cacuu da jicó túhún yehe —n̄acachi a.

¹⁹ Anda já n̄acasáhá na cán cácuéḥa ini na já n̄acasáhá tá in tá in na ndáca tuhún na mé á já cáchí na já xih̄in á:

—Á yehe cacuu da jicó túhún mé ndó.

Já n̄acachi inga tucu da já:

—Á a juú yehe cacuu da.

²⁰ Anda já n̄acachi Jesús já:

—In táhan ndó da cúú uxu ivi, da in ndúu xíxi xih̄in i ini cohó i, da cán cúú da jicó túhún yehe. ²¹ Yehe cúú da n̄achindahá Ndióxi nduu ñayivi ta ndítahan nuú i quivi i tá ín cáchí tuhun Ndióxi. Joo ndáhví nahá n̄acuu da jicó túhún yehe. Janda vaḥa chága ná a cácu da, nduu —n̄acachi a.

²² Nani xíxi na ndúu na ñatiin Jesús pan já ñandiquiahva ndixahvi nu Ndióxi. Tá ñandihí ñasahnda java ña ta ñasahan ña nu ná já cáchí a já xihín ná:

—Júhun ndó jáchi ña yóho cúu tátuhun yiquí cuñu i — ñacachi a.

²³ Tá ñandihí ñatiin a in vaso nu ñúhu tó uva já ñandiquiahva ndixahvi nu Ndióxi. Ta ñasahan mé á do nuú na cán ta tá in tá in na ñaxihí na do. ²⁴ Já ñacachi a já xihín ná:

—Dó yóho cúu dó tátuhun ñí i, dó cuíta sahá cuahá ñayivi. Tá ná cuíta ñí i já candaá ini ndó ña najáxinu coo Ndióxi tuhun a ñasahan sanahá. ²⁵ Mé a ndaa ná cahan i xihín ndo ña a cóho ga i tó uva janda quiahva ná xinu coo quiví coho tucu u inga dó vaha chága tá ná xinu quiví cacomí Ndióxi cuéntá sahá ñayivi —ñacachi a.

*Cáxi tuhun Jesús ña chijehé tuhun Pedro ña xíní da mé á
(Mt. 26:30-35; Lc. 22:31-34; Jn. 13:36-38)*

²⁶ Tá ñandihí ñaxita na in canto já ñaquee na cuahan na yúcu yitó Olivo. ²⁷ Anda já ñacachi Jesús já xihín ná:

—Tóco ndihí ndó jándacoo ndó yehe ñúu viti jáchi já cáchí tuhun Ndióxi já: “Cahní i da ndaa ndicachi ta xihín ña yóho ndicuíta nuu ndicachi jana dá cuhun ri”, cáchí tuhun Ndióxi. ²⁸ Joo tá ñandihí nditacu tucu u ta já cuhun jihna ñúhú yehe estado Galilea anda já cuhun mé ndó — ñacachi a.

²⁹ Anda já ñacachi Pedro já xihín Jesús:

—Vatí ná jándacoo ndihí na mé ndó joo a jándacoo toho i ndohó —ñacachi da.

³⁰ Anda já ñacachi Jesús já xihín dá:

—Mé a ndaa ná cahan i xuhun mé ñúu viti tá cámaní cana ivi chéle já chijehé tuhún ña xínún yehe uní tañu — ñacachi a.

³¹ Já nacasáhá ndúcú ndéé Pedro cáhan da já cáhí da já:

—Vatí ná quivi i xihin ndo joo a chíjehé tuhun toho i sahá ña xíní i mé ndó —nacachi da.

Ta mé quiahva já nacachi ndihi na cán xihin á.

*Tá xíca tahví Jesús tañu yitó olivo naní a Getsemaní
(Mt. 26:36-46; Lc. 22:39-46)*

³² Anda já naxinu na cán in nuú naní Getsemaní já nacachi Jesús já xihin na xíca tuun xihin á:

—Yóho cacoo ndó nani ná cuhun i cáa caça tahví i nu Ndióxi —nacachi a.

³³ Ta ndáca Pedro xihin Jacobo xihin Juan cuahan xihin á. Ta ndaja coo nacasáhá cácuéha ini a ta a juú quiahva táhvi ini a. ³⁴ Já nacachi a já xihin ná:

—Cácuéha ndivaha ini i chí quivi i cúu ini i. Yóho candoo tóo ndó ta coto a cúju ndo —nacachi a.

³⁵ Anda já naquee Jesús cuahan chága chí nuu já nacaxítí a janda quiahva naxinu coo nuu á nu ñúhu cán. Já naxíca tahví a nu Ndióxi ña ná caja mé á ña ná a ndóho a tá quiahva vaxi nu á ndoho a chí nuu. ³⁶ Já cáhí a já xíca tahví a nu Ndióxi:

—Tátá Ndióxi, tóco ndihi ñaha cuu caja ndó. Chindeé ndó yehé ná a ndóho i ña ihvi ndivaha ña vaxi nuú i ndoho i. Joo ná coo tá íin cúní mé ndó ta ná a cóo toho ña cúní yehé —nacachi a.

³⁷ Anda já nandicó coo a nu ndúu na xíca tuun xihin á cán ta já nandiñehé á na quíji na ndúu na. Já nacasáhá cáhí a já xihin Pedro:

—Á quíji vún, Simón. Á cóo nacuu canditún ni in hora.

³⁸ Xíní ñúhú coo tiahva ndó ta caça tahví ndo nu Ndióxi já ná a cóto ndojó rí quini ndohó. Mé a ndaa ínima ñayivi cúní a ndinducú a Ndióxi joo yiquí cuñu na co íin tiahva caja ña cúní Ndióxi —nacachi a.

³⁹ Andá já naquee tucu a cuahān caca tahví a nu Ndióxi. Ta sa mé tuhun nacahan nu cuítí cán nacahan tucu a chí ivi. ⁴⁰ Ta tá nandicó cōo a nandinehe tucu a na xíca tuun xihín á cán ndúu na quíji na jáchi naquehe a mahnú na. Ta chí cō xíni na ndá tuhun nducú ñehe na nu Jesús sahá ña quíji na. ⁴¹ Tá nandicó cōo a táhndá uní já nacachi a já xihín ná:

—Vatí cúní ndó cuju ndo ta vatí cúní ndó ndiquehe ndée ndo joo a cúu caja ndó ña viti. Jáchi sa naxinu cōo hora ndiquiahva na yehe, da nachindahá Ndióxi nduu ñayivi ndahá ñayivi cája cuachi. ⁴² Cuáhán ndacōo ndó ná cōho. Jáchi sa vaxi da jícó túhún yehe —nacachi a.

Tá natiin na Jesús

(Mt. 26:47-56; Lc. 22:47-53; Jn. 18:2-11)

⁴³ Ta nani cáhan yíi va Jesús cándichi a já naxinu Judas, da cúu in táhan da uxu ivi xíca tuun xihín Jesús cán. Ta xihín mé da cán vaxi cuahá ñayivi ñehe na machiti xihín yító viti. Mé na vaxi cán cúu ná na vaxi cuéntá na sacuahā nuú jutū xihín nuú na jánaḥa ley Moisés xihín nuú na sacuahá veñuhu. ⁴⁴ Ta mé Judas, da ndiquiahva mé á nuú na cán sa nacandōo da xihín na cán ña tatí yúhu dá sajóho Jesús jáchi nacachi da já xihín ná:

—Mé da ná tatí yuhú u sajóho, da cán cúu dá tiin ndó ta cató tuun ndó da cañehe ndó cūhun ndo —nacachi da.

⁴⁵ Ta tá naxinu da cán chí ivi laá nacayati da nu Jesús já cáchí da já xihín á:

—Maestro, maestro.

Já natatí yúhu dá sajóho a. ⁴⁶ Andá já natiin tuun na Jesús.

⁴⁷ Joo in táhan da xíca tuun xihín Jesús cán natavá da machiti da já nachitúhun dá in johō da cúu mozo da sacuahā nuú jutū cán. ⁴⁸ Andá já nacachi Jesús já xihín na naxinu tiin ñahá cán:

—Cája ndó xihín i tátuhun cája na xihín taa cuihná jáchi naqueta ndó vaxi ndó tiin ndó yehe xihín machiti ta xihin yíto. ⁴⁹ Ndijáá ní quiivi nasahiin i tañu ndó jan ta najánaħa i ndohó ini veñuhu cáħnu ta ni in tañu coó natiin ndó yehe. Joo tóco ndihi ña yáħa yóħo xíní ñúhú yaħa ña já ná xinu coo nuú ña nacahyi sahá i ini tuhun Ndióxi —nacachi a.

⁵⁰ Anda já naxinu ndihi na xíca tuun xihin Jesús cán cuahān na ta najāndacoo na mé á.

Tá naxinu in datacú cuahān da

⁵¹ Joo in datacú cátiví da in túhún jiní sáħana ndíco da jatá na cán cuahān da ta natiin na da. ⁵² Joo najaní da mé dá ta nacandoo sáħana da já naxinu laħla da cuahān da.

Nasacu na Jesús nuú nataca ndihi na sacuaħa

(Mt. 26:57-68; Lc. 22:54-55, 63-71; Jn. 18:12-14, 19-24)

⁵³ Anda já nasañeħe na Jesús nasahan na nuú da cúu sacuaħa cháħa nu ndíhi jutú. Ta nandique táħan tóco ndihi na sacuaħa nuú jutú xihín na sacuaħa veñuhu xihín na jánaħa ley Moisés. ⁵⁴ Ta nasandíco xíca Pedro Jesús anda quiahva naxinu da yéħe veħe da cúu sacuaħa cháħa nu ndíhi jutú cán. Já nasacoo da xihín da ndáá veñuhu cáħnu cán xítúní da yati yávi núħu cán.

⁵⁵ Ta na sacuaħa nuú jutú xihin tóco ndihi na cómi cuéntá sahá na Israel nataca na cán ndúcú na cuachi jácana na jatá Jesús já cuu cahní ñahá na. Joo coó cuachi jíquí ná ñeħe ná chínúu na jatá mé á. ⁵⁶ Ta cuahā ná nacasáhá cáħan na ña tuhún saħa Jesús joo co xinu tuhun cáħan na jáchi a cuú ndique táħan vaħa tuhun na. ⁵⁷ Ta nandacā ndichi java da cáħan da tuhun jíquí saħa Jesús já cáħí da já:

⁵⁸ —Naxini joho nde nacachi da jan já: “Jánditani i veñuhu cáħnu cán, ña nacavaħa ñayivi ta tixi uní quiví

jácandichi tucu u inga ga ña a cuú cavaḥa ndahá taḥ” —
 ñacachi da.

⁵⁹ Joo ni já coó ñacuu ndique táhan tuhun na xihín ña
 ñacachi na cán.

⁶⁰ Anda já ñandaca ndichi mé da cúu sacuaḥa chága nu
 ndíhi jutu tañu na cán já ñandaca tuhún da Jesús já cáchí
 da já xihín á:

—Á chí a ndúcú ñehún tuhun nuú nde saḥá cuachi
 jácojo na jatun —ñacachi da.

⁶¹ Joo coó ñacahan Jesús ni in tuhun xihín ná já táji níí
 já va ñasahiin a. Mé da cúu sacuaḥa chága nu ndíhi jutu
 cán ñacasáhá ndáca tuhún tucu da a já cáchí da já xihín á:

—Á jivi ndusa yóhó cúún Cristo, da cúu in túhún jini já
 jahyi Ndióxi yii, mé da ñachindahá Ndióxi cacomí cuéntá
 saḥá ñayivi —ñacachi da.

⁶² Anda já ñacachi Jesús já:

—Ajan, jivi yehe cúu dá. Ta vaxi quivi tá cuni ndó
 yehe, da ñachindahá Ndióxi nduu ñayivi cacoo i xoo cuáha
 Ndióxi, mé a íin cuaha ndée. Ta já cuni ndó yehe ndicó coo
 i ñuyívi yóho tañu viço tá ná quixi i chí indivi —ñacachi a.

⁶³ Anda já ñandata da cúu sacuaḥa chága nu ndíhi jutu
 jáhma da ña ná candaa ini ñayivi ña xójo ini da. Já cáchí
 da já:

—Ndá chicuu chága yó ñayivi ndicani nu yo. Xihín ña
 ñacahan da yóho cándaá iní ña ndája núu da Ndióxi. ⁶⁴ Á
 sa ñaxini johó ndó ña ndája núu da Ndióxi xihín tuhun
 ñacahan da. Ndaja xíní ndó caja í xihín dá viti —ñacachi
 da.

Anda já ñandique táhan tuhun ndihi ñayivi ña ndácaan
 cuachi nu Jesús ña cán queá ndítahan quivi a.

⁶⁵ Java na ñacasáhá na xihnu ndaa na tójií nu á ta java
 na ñachicaji na jáhma nu á já ñacasáhá cáni na jahnda nuu
 á já ndáca tuhún ñahá na já cáchí na já xihín á:

San Marcos 14:66 70 San Marcos 14:72

—Cahan xihín nde yo nacani yohó viti —nacachi na.

Ta janda na ndáa veñuhu cáhnu cán viti nacasáhá cáni na jahnda nuu á.

Tá naxijehé tuhun Pedro ña xini da Jesús

(Mt. 26:69-75; Lc. 22:56-62; Jn. 18:15-18, 25-29)

⁶⁶ Ta ndaja coo Pedro iin yii dá xítúni da cán já naxinu in ñá cája chúun xihín da cúu sacuaḥa chága nu ndíhi jutú.

⁶⁷ Já naxini ñá xítúni Pedro ta nahá vaha nasandehé ñá nu dá já cáchi ñá já:

—Yóhó cúun táhan da xica tuun xihin Jesús, da ñuu Nazaret —nacachi ñá.

⁶⁸ Joo naxijehé tuhun da ña xini da Jesús já cáchi da já:

—Uhun. Co xini toho i da ta co xini toho yehe ndá saha cáhun —cáchi Pedro.

Anda já nacayati da yuyehé ta ivi laá nacana chéle. ⁶⁹ Tá naxini mé ñá cája chúun xihín da cúu sacuaḥa chága nu ndíhi jutú cán ña nasandichi too da yehé cán já nacasáhá ña cáxi tuhun ñá xihin tóco ndihi ñayivi ndúu cán já cáchi ñá já:

—Candehé ndó. Da cáa cúu in táhan da xica tuun xihin Jesús —nacachi ñá.

⁷⁰ Nacachi tucu Pedro ña co xini da Jesús. Chá va nayaha ña yóho ta já nacachi na ndúu xítúni cán xihin Pedro:

—Táhan ri da cáa va cúu yóhó jáchi cúun da Galilea ta cáhun tátuhun cahan na cán —nacachi na.

⁷¹ Anda já nacasáhá Pedro canahá da ta natavá da quivi Ndióxi ña co xini da Jesús já nacachi da já:

—Ni co xini mí i ndá taa cúu da jan, da cahan ndó sahá jan —nacachi da.

⁷² Tá nacachi da já ivi laá nacana chéle ña chí ivi. Anda já nandicuhun ini Pedro ña nacachi Jesús xihin dá tá nacachi a já: “Tá camaní cana ivi chéle sa chíjehé tuhún ña xínun

yehe uni tañu.” Tá nandicuhun ini Pedro ña yóho já nacasáhá sácu ndivaha da.

15

Tá nandiquihva na Jesús ndáha Pilato

(Mt. 27:1-2, 11-14; Lc. 23:1-5; Jn. 18:28-38)

¹ Tá nativi inga quivi itaan já nandique táhan na sacuahá nuú jutú xihín na sacuahá veñuhu xihín na já-ñaha ley Moisés xihín ndihi na cómi cuénta sahá na Israel. Já nacató na Jesús ñehe na a cuahan na já nandiquihva na mé á nu Pilato. ² Ta mé Pilato nandaca tuhún da Jesús já cáchí da já xihín á:

—Á mé a ndaa cúun in rey, da cómi cuénta sahá na Israel.

—Ajan. Jivi cúu u tá quihva cáchí ndo jan —nacachi Jesús xihín dá.

³ Ta najáchojo na sacuahá nuú jutú cán cuahá cuachi jata Jesús. ⁴ Já nandaca tuhún tucu Pilato Jesús já nacachi da já xihín á:

—Ndavaha co ndúcú ñehún tuhun nuú i. Candehé ndaja cuahá nuú cuachi jáchojo na jatun —nacachi da.

⁵ Joo ni in tuhun coo nacañan Jesús. Tá naxini Pilato ña co ndúcú ñehe Jesús tuhun já nacatóntó da sahá ña cája.

Sácu ini na saha Jesús ndaja caja na ña ná quivi a

(Mt. 27:15-31; Lc. 23:13-25; Jn. 18:38-19:16)

⁶ Tañu mé víco pascua nasahin costumbre Pilato ña janí da in da ndacaan vecaa. Ndá da cúni ñayivi janí da, da cán cúu da janí da. ⁷ Ta ndaja coo mé já ndacaan in da naní Barrabás vecaa xihín java ga da naxica xihín dá. Ndacaan da vecaa sahá ña nasahni da ndii tá ndivaa ñayivi. ⁸ Chí naxinu ñayivi nu Pilato já nacasáhá na cáhan na xihín dá ña ná caja da tá quihva sá caja da. ⁹ Joo nandaca tuhún Pilato na já cáchí da já:

—Á cō cúnĭ ndó ña ná janí ĩ da cúú rey nuú ñayivi Israel yóho —ñacachi da.

¹⁰ Ñacachi Pilato ña yóho jáchĭ xínĭ da ña nandiquiahva na sacuahā nuú jutū cān Jesús nu da sahá ña cáhĭhvĭ ini na xĭhĭn á. ¹¹ Joo na sacuahā nuú jutū cān ñacasáhā na jándinĭhi na ñayivi ña ná cachi na xĭhĭn Pilato ña ná janí da Barrabás. ¹² Tá nandĭhi já nandāca tuhún Pilato na já ñacachi da já xĭhĭn ná:

—Ndĭa cúnĭ ndó caja ĩ xĭhĭn da cáchĭ ndó cúú rey nu ndóhó, na Israel —ñacachi da.

¹³ Andā já nanducú ñehe ñayivi cān tuhun nu Pilato já cáchĭ na já xĭhĭn dá:

—Cata caa ndó da ndĭca crúxu.

¹⁴ Já ñacachi Pilato já xĭhĭn ná:

—Ndá cuachi ñacaja da, vaha.

Joo ví ga ví cáyuhú cóhó na já cáchĭ na já:

—Cata caa ndó da ndĭca crúxu.

¹⁵ Ta sahá ña cúnĭ Pilato candoo vaha da nuú ñayivi najaní da Barrabás. Ta tá nandĭhi najácaxáhan na Jesús já nandiquiahva da a ndáha na cuhun cata caa ñahá na ndĭca crúxu.

¹⁶ Andā já ñehe soldado Jesús cuahan na yuyéhe vechúun cān. Já najánditaca soldado cān java ga táhan da. ¹⁷ Já nāchinúu na in jahmá cuáhá túun jatā Jesús ta nāchinúu na in tiyivi ĩñu jĭnĭ á. ¹⁸ Tá nandĭhi já ñacasáhā na cáyuhú na já cáchĭ na já:

—Cāhnu nahá ná cacuu yóhó, da cúú rey nuú na Israel —cáchĭ na sácū ndaa ñahá na.

¹⁹ Tá nandĭhi ñacasáhā cáni na yiquí jĭnĭ a xĭhĭn in ndoo ta ñacasáhā na xĭhnu ndaa na tójĭí na nuu á já ñacasáhā na cáxítĭ na nu á ña cája na tátuhun cája cáhnu na a. ²⁰ Tá nandĭhi ñasacu ndaa na a já ñatavá na jáhma cuáhá túun

ñā nāsanúu jatá. Ta najándaca ndixi na a xihín jáhma mé á já nasañehe na a cuahan nā cata caa na a ndica crúxu.

Tá nacata caa na Jesús ndica crúxu

(Mt. 27:32-44; Lc. 23:26-43; Jn. 19:17-27)

²¹ Tá ñéhe na Jesús cuahan nā cata caa na a ndica crúxu já nandique táhan na xihín in da vaxi da ndihvi da ñuu Jerusalén. Mé da cán naní da Simón, da ñuu Cirene, da cúu tátá Alejandro xihín Rufo. Já nacaja ndúsa ná xihín dá ñā ná ndicojo da crúxu nuú cata caa na Jesús.

²² Já nasañehe na Jesús nasahan nā in xiqui naní Gólgota. Tuhun yóho cúni cáchí a: nu ndúu lásá yiquí jini ndii. ²³ Cán nasahan nā vino nu Jesús, dó nacava táhan xihín jusa ñā naní mirra. Joo coó naxeen toho a coho a do. ²⁴ Anda já nacata caa na a ndica crúxu. Já nacasáhá soldado cán sájiquí da saha jáhma Jesús ta nacachi xihín táhan da ñā ndá da ná quee vaha cuu quehe in in jáhma Jesús.

²⁵ Ta cúu á tátuhun caa in naha tá nacata caa na Jesús ndica crúxu cán. ²⁶ Ta jini ndica crúxu cán nacahyí nā ndá sahá nacata caa na a ta já cáchí a já: “Da yóho cúu rey nuú nā Israel.” ²⁷ Ta sa mé já nacata caa na ivi ta cuihná xihín Jesús: in da xoo cuáha ta in da xoo íti. ²⁸ Ta xihín ñā yóho naxinu coo tuhun Ndióxi tá cáchí a já: “Tañu ta quini nasacu na a.”

²⁹ Chí cava jini mé ñayivi yáha cán canahá nā xihín á já cáchí nā já:

—Candehé. Yóho cáchún ñā jánditanun veñuhu cáhnu cán ta tixi uní víxí quiví cáchún jácandichi tucún ñā. ³⁰ Jácacu mún. Cuáhán nuu ndica crúxu jan —nacachi na sácu ndaa ichi nā.

³¹ Ta quiahva já cava nā sacuahā nuú jutū cán xihín nā jánaha ley Moisés sácu ndaa ñahá nā. Ta nacasáhá cahan xihín táhan na já cáchí nā já:

—Nacuu nacaja Jesús jácacu da java ga ñayivi joo viti a cuú jácacu da mé dá. ³² Tá ta mé a ndaa cuú dá Cristo, da cuú rey nuú na Israel ná nuu da ndica crúxu viti ñúhú já ná candúsa nde da —cáchi na.

Ta janda da ivi táhan ndácaa ndica crúxu jín á cán canahá da xihín á.

Tá naxihí Jesús

(Mt. 27:45-56; Lc. 23:44-49; Jn. 19:28-30)

³³ Tá naxinu coo çaxivi ndaa nacanaá níí cuú ñuyívi ta janda caa uní sahini já nacasáhá nandiyehé tucu. ³⁴ Ta sa mé hora já nacayuhú cóhó Jesús já cáchi a já:

—Eloi, Eloi, lama sabactani —nacachi a. Tuhun yóho cúni cáchi a: Ndióxi mí i, Ndióxi mí i, ndávaaha najándacoo ndáha ndó yehé.

³⁵ Ta java na ndíta cán naxini johó na tuhun cáchi a. Já nacachi na já:

—Cuni johó ndó jáchi cána da profeta Elías —nacachi na.

³⁶ Anda já xínu in da nasahan da nachindaxi da in ticoto ini vino iyá. Já nacató da mé ticoto cán nuú in yitó ndoo já nachitivi da do yati yúhu Jesús ña ná coho a do. Já nacachi da já xihín java da cán:

—Cóho candehó á quixi Elías jánuu a da ndica crúxu —nacachi da.

³⁷ Anda já nacayuhú cóhó Jesús já naxihí a. ³⁸ Anda já nandatá java ndaa jáhma ndeé ña sáji nuu nuú yíi ndivaaha veñuhu cáhnu ñuu Jerusalén cán. Janda jini á ta janda sahá nadata. ³⁹ Ta ndaja coo in dataa, da sáhdá chuun nuú soldado cuéntá Roma nasahin da nu ndácaa Jesús cán ta tá naxini da naxihí a já nacachi da já:

—Mé a ndaa táhyí cuú da yóho in túhún jini já jahyi Ndióxi —nacachi da.

⁴⁰ Ta naṣanduu java najihí ta sándehe xícá na Jesús. Tañu na yóho naṣandacaan ñá naní María, ñá ñuu Magdala xihín María, ñá cúu náná Jacobo, da loho chá nuú José xihín in ñá naní Salomé. ⁴¹ Naṣandico najihí yóho jata Jesús ta nachindeé ñahá na tá naṣahiin a estado Galilea. Cuahá ga najihí naṣanduu cán ta java na cúu ná na naṣahan xihin á ñuu Jerusalén jihna tá cámaní quivi a.

Tá najánduxu na Jesús

(Mt. 27:57-61; Lc. 23:50-56; Jn. 19:38-42)

⁴² Tá na cauaá tóo uun quiví viernexe tá cámaní casaa quivi ndíquehe ndée na Israel já na yaha tóco ndihi ña yóho. ⁴³ Ta ndaja coo íin in da naní José, da ñuu Arimatea, da cúu táhan na cómí cuéntá sahá na Israel. Mé José yóho ndáti da casaa quiví cacomí Ndióxi cuéntá sahá ñayivi ñuyiví yóho. Ta naṣahan ndeé ini da cuhun da cahan máni dá xihín Pilato sahá yiquí cuñu Jesús ña ná quiahva mé Pilato ña nu dá. ⁴⁴ Chí na catóntó Pilato tá na candaa ini da ña sa naxihi Jesús. Já na cana da da sáhdá chuun nuú soldado da já na daca tuhún ñahá da á sa naxihi Jesús. ⁴⁵ Tá na caxi tuhun da cán nu Pilato ña sa naxihi Jesús já naṣahan Pilato ñamani nuú José ña ná ndiquehe da yiquí cuñu Jesús. ⁴⁶ Anda já na xeen José in jahmá vaha ta najánuu da yiquí cuñu Jesús ndica crúxu já nachitiví da ña xihín mé jahmá vaha cán. Tá na ndihi já nachicaan da mé yiquí cuñu Jesús cán ini in yávi ndacaan ndica cáva. Tá na ndihi já nachijahvi da yuhú cáva cán xihín in yuu jáhdá cáhn. ⁴⁷ Ta ndaja coo María, ñá ñuu Magdala xihín María, náná José na sándehe na nuú na sacu na yiquí cuñu Jesús ini mé cáva cán.

16

Tá nanditacu tucu Jesús

(Mt. 28:1-10; Lc. 24:1-12; Jn. 20:1-10)

¹ Ta tá sa nayaha quivi ndíquehe ndée na já nasahan María, ñá ñuu Magdala xihín María, ñá cúu náná Jacobo xihín Salomé viti naquee na cuahan na cueen na java nuú ñaha támi sahan ña chindáa na yiquí cuñu Jesús. ² Ta naha chá mé quivi domingo tá naqueta candii já cuahan na nuú nachicaan na yiquí cuñu Jesús cán. ³ Ta nani xíca na cuahan na íchi cán já ndítuhún xihín táhan na ndá quiahva caja na tavá na yuu ndájí nuú ndácaan yiquí cuñu Jesús cán. Já cáchí na já:

—Yo tavá toho yuu ndájí nuu nuú quihví ini nu ndácaan yiquí cuñu Jesús —cáchí xihín táhan na cásahan na jáchi cáhnu ndivaha mé yuu cán.

⁴ Joo tá naxinu na mé cáva cán já naxini na ña coó ga yuu ndájí yuhú cáva cán. ⁵ Ta tá nandihvi na mé cáva cán já naxini na cáa íin in dataa ndíxí jahmá yaa ña cáni. Íin coo da xoo cuáha ta cúu dá da yúta. Tá naxini najihí yóho da cán chí nayihví na. ⁶ Anda já nacaahan da cán já cáchí da já:

—A yíhví toho ndó. Xíni yehé ña ndínducú ndo Jesús ña Nazaret, ña nacata caa na ndíca cruxu. Candehé ndo nuú nasacu na a. Coó ga íin viti jáchi nanditacu tucu a. ⁷ Ta viti cuáhán ndo caxi tuhun ndó xihín na naxica tuun xihín á ta xihín Pedro ña cánuú mé á cuahan estado Galilea. Tá cuhun ndó cán já cuni ndó a tá quiahva nacachi mé á xihín ndo —nacachi táto Ndióxi.

⁸ Já naquee na cán xínu na cuahan na jáchi nayihví ndivaha na anda quíji ninu na. Coó nacaahan na xihín ni in ñayivi jáchi nayihví ndivaha na.

*Tá naxini María, ñá ñuu Magdala Jesús
(Jn. 20:11-18)*

⁹ Tá nandihvi nanditacu tucu Jesús ta tá nativi mé quivi domingo já ñá nu cuítí naxini Jesús nasacuu ñá María, ñá ñuu Magdala, mé ñá natavá Jesús usa rí quini nasandacaan

ini ñá. ¹⁰ Ta tá naxini ñá mé á já ñaquee ñá cuahān ñá caxi tuhun ñá nuú nā naxica tuun xihin Jesús ñá tácu a. Ta ndúu cuéha ini na ta sácu na ndúu na tá ñasaa ñá. ¹¹ Ta ñacaxi tuhun ñá nu ná ñá ñanditacu tucu Jesús ta naxini ñá mé á joo coó ñaxeen na candúsa na ñá.

*Tá naxini ivi da naxica tuun xihin Jesús mé á
(Lc. 24:13-35)*

¹² Ta tá ñandihí já ñandijama Jesús ndá quiahva cáa já ñandaça náha á nuú ivi táhan nā cuahān yúcu, nā naxica tuun xihin á. ¹³ Joo tá ñandicuni na mé á já ñaquee na cuahān nā caxi tuhun na xihín nā java cán joo coó ñaxeen na candúsa na tuhun ñacahān ndívi nā yóho xihin ná.

*Sáhdá Jesús chuun nuú nā xica tuun xihin á
(Mt. 28:16-20; Lc. 24:36-49; Jn. 20:19-23)*

¹⁴ Tá ñandihí cán ñandaça náha Jesús nuú ndíhuxu in nā naxica tuun xihin á nani ndúu na xíxi na. Já ñacasáhá jánani a nā jáchi ñandaja táhyí nā ínima ná ta coó ñaxeen na candúsa na ñá naxini nā java cán Jesús tá ñandihí ñanditacu tucu a. ¹⁵ Já ñacasáhá cáchi Jesús já xihin ná:

—Cuáhán ndo ní cúu ñuyívi yóho ta caxi tuhun ndó xihín ndihí ñayivi tuhun vaha sahá i. ¹⁶ Ta ndá nā ná candúsa yehe ta candúta ná já quéa cacu ndaa ínima ná ta a cúhun nā indayá. Joo nā co candúsa yehe, nā cán cúu nā cúhun nā ndoho ini na indayá andā ama cáa quívi. ¹⁷ Joo nā cándéé ini yehe caja na ñá xitúhún. Ta xihín quívi yehe tavá nā ínima quini ndácaan ini ñayivi. Ta ndacahān nā tuhun saá ñá coó ñacatihva na. ¹⁸ Ta tá ná tiin ndáha ná coo ta tá ná coho na ñá cúu cahní ñahá, a cáhní toho a nā. Ta tá ná chinúu na ndáha ná jimí nā quíhvi já ndivaha mé nā quíhvi cán —ñacachi Jesús.

*Tá ndaa Jesús cuahān indiví
(Lc. 24:50-53)*

¹⁹ Tá nãndihi nãcãhã Jesús, xitoho í tóco ndihi tũhun yóho xihĩn ná andã já nãndindita cuãhã indivi ta nasacoo a xoo cuãha Ndióxi, tátã yo. ²⁰ Tá nãndihi já nãquee nã nãxica tuun xihĩn á cãn cuãhã nã cãxi tũhun na tũhun vãha sãhã Jesús ndijãã ñuu. Ta já nãchindeé Jesús, xitoho í nã cãn ta náhã ñã cúú á ñã ndaa cãhã nã jáchi nãcãja mé á ñã cúú cája na cuãhá nyú ñã xitũhũn. Já ná coo.

Tuhun saá ña najándacoo Jesucristo nu yo: El Nuevo
Testamento en el mixteco de Silacayoapan
New Testament in Mixtec, Silacayoapan (MX:mks:Mixtec,
Silacayoapan)

copyright © 2009 Wycliffe Bible Translators, Inc.

Language: Mixtec, Silacayoapan

Translation by: Wycliffe Bible Translators, Inc.

Mixtec, Silacayoapan

mks

Mexico

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Silacayoapan

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 27 Sep 2019 from source files dated 27 Sep 2019

7f2d3ecf-6d15-55a5-9081-6e970474df2f